



ANTIMARTINVS,

SIVE

Monitio cuiusdam Londinensis ad

*Adolescentes utriusque Academiae, con-*

*tra personatum quendam rabu-*

*lam, qui se Anglicè*

MARTIN MARPRELAT,

*Hoc est,*

Martinum Μαρτυράρον, ἡ μωσαίον  
vocat.

Rom. 16. vers. 17.

Παραγγέλλω ὑμῖν ἀδελφοί, σκοπεῖν ἐπὶ τὰς διχοστασίας καὶ τὰ συμβαίνοντα παρὰ τὸ  
διδάχθην ὑμῖν ἐμὴν διδασκαλίαν καὶ ἐκκλίνειτε ἀπ' αὐτῆς.



LONDINI,

*Excudebant* Georgius Bishop,

& Radulphus Newbery.

*Anno Domini,*

1589.

A. T. T. M. A. R. T. I. N. V. S.

Monino cundam Londinensis ad

Molecentur rebus Londinensis con-

tra personam Londinensis

Lat. 51. 30. N. Long. 0. 7. W.


M. A. R. T. I. N. V. S.

M. A. R. T. I. N. V. S.

Roma. 17. 17.

Lat. 41. 54. N. Long. 12. 29. E.

Lat. 41. 54. N. Long. 12. 29. E.



L. O. N. D. O. N.

Excelsam Georgius Bishop

& Radolphus Newbery

Printed by

1779.





**DE** REPUBLICA iuuentutis educandæ curam Persæ veteres mihi videntur habuisse. Apud quos morem fuisse dicit Xenophon, vt illorum pueri non solum sub diligentissimis præceptoribus iustitiam discerent; sed & in senum conspectu semper

luderent. Hanc enim ob causam euaserunt rerum æstimatores peritissimi, nec non in omni vitâ temperatissimi modestissimiq;. Vtinam etiam Anglorum disciplinam hoc nomine mihi prædicare liceret, laudareq; apud nos tùm Senum in adolescentibus instituendis solertiam, tùm Adolescentum in Senibus imitandis pietatem.

Sed mores nostri quanto hîc sunt solutiores; tanto maiorem gratiam merêtur illi, quos non lex vel consuetudo cogit, sed sua voluntas potius suadet fructus ingenij sui multo labore longaq; experienciâ conquistos tyronibus delibandos exhibere. Hoc autē cum in omni scientiâ sit laudabile; tum maximè in ijs studijs, quæ spectant animæ salutem; nec tam istius vite commodis, quàm futuri sæculi gaudijs inseruiunt: præsertim his temporibus, quæ tam discrepantes religionum varietates pepererūt, & in tam multiplices opiniones mentes nostras distraxerunt; vt (tanquam liquescentibus iam coelis, vltimóq; fine rerum imminente) prius vniuersi rationem nostrorum operum Christo Iudici reddituri, quàm pauci in diuini cultus vnitatem coituri videamur. Nam in omni Rep. religionis cura semper antiquissima esse debet, primóq; loco rerum diuinarum administratio probè constitui; deinceps reliqua vitæ bona tanto celeriori pede subsequenter.



Hoc mihi diu multúmque cogitanti; serenissimæque Principis nostræ summam in Euangelio híc plantando sanctitatem, vigilantissimam in stabiliendo curam, ardentissimum in propagando studium perpendenti, profligatissima iam pridem planèque execranda visa est illorum hominum impietas, qui receptam ecclesiæ nostræ disciplinam obruunt suis ineptijs, eiúsque statum diuturnâ pace mirificè iam confirmatum, inauditarum nouitarum inuectione peruellunt ac demoluntur. Quam ipsorum tam insignem audaciam, cum nec clementissimæ prudentissimorum virorum monitiones retardare possint, nec leges cohibere: proximum tanti mali remedium hoc mihi videtur; ut, si qui sint, quos hæc labes adhuc non infecit; illorum animi præoccupentur, quantum fieri potest; & tam pestiferæ turpissimorum errorum contagioni præcludantur. Huic verò non aptior est locus, quàm utrâque Academia, quæ tanquam fontes sunt, vnde tota Resp. doctrinarum salubritate religionisq; puritate riganda est. Ipsi enim fontes si fecem contraxerint, riuuli quidem ab ipsis dimanantes synceritatem suam retinere non possunt.

Cum igitur nuper exortus sit quidam personatus *Martinus*, qui præcessorum suorum futili leuitati summam etiam dementiam, ac petulantissimam maledicendi licentiam adiunxit; libellósque suos mendacijs, conuicijs, omnique nequitia genere refertissimos (nescio quibus è latebris) in vulgus emiseric: statim timere coepi, ne in mentes vestras (Iuuenes Academici) ex improviso posset influere, sensusque vestros non satis adhuc confirmatos & perfectos, suis turpissimis illecebris deprauare.

Quamuis igitur plurimos esse minimè dubitem, qui non solum maiori scientiâ, sed & eloquentiâ longè



gè splendidiore vestros animos contra nefarias *Martini* astutias præmunire ac corroborare possent: quòd tamen aliorum industriam vel ipse labor frangat, vel invidia retardet, vel acerbissima *Martini* lingua deterreat, vel fortè grauissimæ Reip. occupationes impediunt: Ego quidem omnium infimus duxi pertentandos hoc in genere meos nervos; virisque doctissimis exponendum, quanto meliùs hoc onus ipsi in se suscepisse potuissent, quàm mihi frigido nimis & ieiuno Patrono reliquisse. Cùm viderint enim hanc causam exiliter à nobis tractatam, quam ipsi scitissimè perorassent: non tam ægrè ferent mihi in eâ suscipiendâ defuisse considerationem, quàm sibi ipsis in negligendâ beneuolentiam.

Flagitare etenim videtur (optimi adolescentes) non Academiarum tantùm, sed & totius nostræ Reip. salus, vt aliquis huic audaciæ sese obijciat; vósque, quibus ille maximè cupit imponere, de vastrâ ac malitiosâ illius versutiâ præmonere. Non quòd vobis ipsis literæ multæ, non quòd acutissima ingenia desint: sed quòd tales adhuc per vestram ætatem sitis, qui rectiùs potestis de verborum delectu atque orationis virtutibus, quàm de rerum pondere ac momento iudicare. Nec molestè (quæso) feratis hanc nostram suspicionem in eo, quòd verborum lenocinijs vos capi posse putem; cùm vltima omnium celsissimâque prudentia sit in rebus abstrusis, præsertim in theologiâ, verum à falso discernere. Sed amorem nostrum amplectimini potius atque exosculamini, qui vos iam ad virtutis ac prudentiæ culmen strenuè contendentes, & ad omnes Reip. dignitates expectatos, è viâ deduci non patitur tam impuri hominis delirijs; sed cupit potius in illis vestigijs vos continere, per quæ multos Maiores vestros duæ illæ Matres indulgentissimæ non tantùm



ad summum sapientiæ gradum, sed & celsissimum honoris fastigium extulerunt. Quos ut indubitata spe, minimòque cum præiudicio sequamini; primùm ostendam vobis quis sit, qui istas infidias vobis posuit: deinde in omne vitæ officium quàm turpiter impigerit.

Ac ut existimationis suæ fundamenta concinnè iacet, primò nomen suum ridiculè quidem e mentitur, séque (si Deo placet) *Martinum Marprælatum* appellat. *Marprælatum* autem, hoc est, *μαστράρχον* se dici cupit ab effectis, ad quæ collineat, sed nunquam est affecuturus. Conatur etenim & plurimorum innocentissimorum *Prelatorum* vitas falsissimis criminationibus aspergere, & in omnium fortunas apertis faucibus inuolare, nomen denique ipsum è rerum natura dele-re atque tollere. Hic vir minimè clarus è lupanari aliquo, quantum suspicor, (nam domicilij sui non minùs eum pudet, quàm nominis) tres propter scurrilitatem ineptissimos, propter malitiam impurissimos libellos in lucem eiecit, quibus foedissimas labe- ornatissimis sanctissimisque nostris Prælati- bus, doctissimisque huius Ecclesiæ Ministris voluit quidem multas, sed reuera potuit nullas inurere. Singula illius mendacia percurrere planè esset infinitum: quippe libri sui non verbis magis, quàm impudentissimis fictionibus refarciuntur. Satis igitur sit dicere: quòd quicquid in illis libellis grauiori quinquam onerat ignominiâ; totum illud malitiosè finxerit: quicquid facetum esse videtur, neque fortiùs aliquem premere; totum illud spurcissimis Mimorum scenis ridiculè subduxerit,

Hunc ego virum statui perstringere, vobisque (qualis qualis sit) non tam ludicrè deridendum, quàm seriò fugiendum propinare.

Duplex



Duplex autem hîc suboritur mihi cum *Martino* controuersia. Prior nimirum de via, rationeque, quâ disciplinam suam aggreditur, & stabilire cupit. Altera de naturâ & veritate noui & repurgati dogmatis. Illam solùm hæc nostra oratio pertractabit; præsertim cùm hæc maioris sit studij, longiorémque multò exposcat indagationem, quàm ego statui persequi, priusquam intellexero illas huius orationis esse vires, quæ futuræ meæ diligentiae cupiditatem aliquam in vobis excitare possunt. Hoc etenim hæctenus vita nostra obseruauit, vt sponte nunquam in arenam descenderim. Et nunc si istas primitias illorum palatis minùs arridere sensero, quorum in gratiam illas consecraui; quamprimùm equidem conquiescendum mihi censeo, reliquùmque ætatis meæ tempus domi mihi (quod aiunt) & Musis tribuendum.

Nunc igitur vt admiremur, suspiciamúsque tanquam cælitus dimissam huius Pandoræ cornucopiam; verasque reformatoris nostri pollicitationes concedamus: ostendam tamen *Mercurium* hunc in exponendâ legatione suâ, primùm in communem politiam; deinde in expressas leges omnium laudatarum Rerumpub. tertio in theologiæ fundamenta stupidissimè deliquisse. Hæc enim si priùs vobis constiterint; tum necessum est vel de *Martini* fide multùm apud vos diminui; vel saltem phreneticum hoc nouitatis desiderium priscam illam vestram modestiam in intractabilem obstinariam, & solitam indolem in extremam desperationem conuertisse.

Hoc autem vt perspiciatis; intelligendum vobis est, primis illis ciuitatum Rerúmquepub. conditoribus tantæ solertiæ finem propositam fuisse tranquillam pacatamque vitæ degendæ rationem. Cuius etiam causâ non solùm muros extruxerunt, arma fabricati sunt,



sunt, munimenta excogitarunt, quibus externorum impetus depellerent: sed domi etiam leges sanxerunt, quibus ciuilem discordiam, communisque societatis dissolutionem euitarent. Leges autem vel vniuersæ ciuium saluti, vel singulorum vtilitati prospiciebant. Quæ verò vniuersorum statum spectabant, iuris publici: quæ priuatorum commoda præcipuè cōtinebant, iuris priuati nomen sumpserunt. Ius publicum religionem, Numinisque cultum primò; deinde rerum externarum vitamque ciuilem tangentium administrationem comprehendit.

Sed cùm leges quasi exangues iaceant atque intermortuæ, nisi sit, qui vitam illis atque animam executionis assiduitate suffundat: etiam selecti sunt quidam è populo viri præstantiores, qui legum exequendarum curam in se susciperent, legumque quasi magistri essent, & ideò Magistratus appellarentur. Atque hij Magistratus cùm iusticiæ dispensationem legibus consentaneam habeant; apud benè constitutas Respub. nihil vnquam fuit antiquius, quàm summa non solum erga horum personas veneratio; sed etiam erga ipsorum præcepta iussionesque reuerentia. Sic vt prætereunti Magistratui non assurgere, Romæ quidem insignis esset contumelia: Cæcúsque, quamuis iuris peritissimus, ad publicum aduocandi munus non admitteretur, quòd in subsellia ascendens Prætorem conspiceret non posset, nec igitur illi debitam reuerentiam exhibere.

Sed inter reliquos non Ethnici solum, sed Iudæi & Christiani maximo semper honore illos habuerunt, quibus religionis cura, rerumque diuinarum administratio commissa est. Atque hinc fit, quòd Homerus (quem sub fictæ historiæ tanquam vmbra totius humanæ vitæ munus & officium comprehendisse sapientissimi



entissimi credunt) propter *Chrysen Apollinis* sacerdotem malè tractatum ab *Agamemnone*, pestem sæuissimam *Græcorum* exercitum miserrimè cruciasse dicat. Apud veteres quoq; non solum *Lacedæmonios*, sed *Latinos, Romanosq;* in more fuit; vt ipsi reges Sacerdotes etiam essent, *Dijsq;* suis manibus sacrificarent. Póstque exactos *Romanorum* Reges propter illam *Tarquini* nequitiam, cum iam non esset, qui illas religionis sue vires suppleret; non solum propter ipsius officij necessitatem sacrificulum statim creandum censuerunt: sed etiam, quòd Deorum cultui non nisi summos honorificosq; viros præficiendos existimarent, Sacrificulum hunc è patribus elegerunt, *Regemq;* *Sacrificulum* nominarunt.

Apud veteres etiam *Gallos*, eorum hominum qui in aliquo fuerunt numero & honore, duo fuisse genera historia prædicat. Quorum alterum fuit *Druidum*, alterum *Equitum*. *Druides*, quòd rebus diuinis præessent, sacrificia procurarent, religionesq; interpretarentur; magno quidem apud illos honore fuerunt. Si quod admissum facinus, si cædes facta, si de hæreditate, de finibus controuersia foret; iidem discernebant, præmia poenasq; constituebant. Si quis aut priuatus, aut populus eorum decreto non stetisset, eum sacrificijs interdicebant. Quibus autem ita fuit interdictum, ij numero impiorum ac sceleratorum habebantur. Ab ijs omnes decedebant, aditum eorum sermonemque defugiebant, ne quid ex contagione incommodi caperent. Neque ijs petentibus ius reddebatur, nec honos ullus communicabatur. Certo anni tempore ad illos in mediâ *Gallia* regione confidentes, omnes vndique, qui controuersias habebant, accedebant; eorumq; iudicijs decretisq; parebant. *Druides* autem bello abesse consueuerunt, neq; tributa cum reliquis pendebant,



debant, militiæ vacationem, omniûmq; rerum habebant immunitatem.

Sed Ethnicorum reuerentiam erga Sacerdotes nihil declarat apertiùs, quàm illud *Alexandri Magni* facinus. Cui *Iudæam* armis aggredienti, iam iamq; *Hierosolymam* (vt putabatur) oppugnaturus, cùm *Iaddus* Pontifex sacerdotibus & urbanâ multitudine comitatus obuiam veniret: *Alexander* videns è longinquo candidatum populum, & Sacerdotes ante agmen in amictu byssino, Pontificemque in stolo hyacinthinâ auro distinctâ, tiaram in capite gestantem cum præfixâ laminâ aureâ, quæ Dei nomen insculptum habebat; solus ad eum accedens nomen illud adorauit, & primus salutauit Pontificem. Iudæis autem omnibus vno ore consalutantibus *Alexandrum*, & in orbem cingentibus; *Syria* Reges (qui illum in exercitu sequebantur) reliquique obstupuerunt, vix credentes Regem mentis compotem. Solus *Parmenio* propiùs accedens rogauit quid ita, cùm ipse adoraretur ab omnibus, nunc adoraret *Iudæorum* Pontificem? At ille nō hunc se adorasse respondit; sed Deo, cuius Pontifex esset, honorem illum exhibuisse: Ac si amorem nostrum erga Deum non declarari meliùs, quàm in honore Sacerdotibus suis dato, Princeps illic maximus iudicasset.

Sed quid tam multa de Ethnicis, cùm ipse Deus exercituum Deus noster *Aaronem* sic in Sacerdotium religionisq; præfecturam segregauerit, vt non solum in delectu suo generis nobilitatem respexisse; sed etiam in ipso quem illi præscripserat ornatu, reuerentiam, & honorē eius cogitasse meritò iudicetur? Quod etiam indè manifestum est; quod Pontifex summus Tribus *Leuitica* princeps, ac quasi dux esset; quam Tribum Deus sorte prædiorum orbauit in religionis ac diuini cultus officium segregatam, summisq; alijs præmijs



præmijs & honoribus decorauit. Nam & participes eorum quę sibi oblata erant, effecit; & solum cultum eius tractare, tanquam curam sortemque propriam, voluit.

Sic etiam *Abrahami* temporibus Regis *Melchisedechi* dignitati Maiestatiq; multum adiectum esse visum est, quod illum cum imperio iuste viuentem, summo sacerdotio dignum etiam Deus iudicaret.

Si recentiora adhuc tempora, Christianorumque morem placeat intelligere; nullum bonum principem reperiemus, qui multis prærogatiuis Episcoporum statum non exornaret; nullam recte constitutam Rempublicam, quæ Sacerdotes Deique ministros summâ veneratione non haberet. Ita vt vel in Principibus bonitatem, vel in Republica disciplinam certioribus argumentis historici non laudauerint, quam vt sacrorum virorum singulos ordines maximis beneficijs auxerunt, amplissimisque dignitatibus honorarunt.

Atque inter reliquos *Constantinus* ille magnus Episcoporum authoritatem tam modestè suscepit, reueritusque est; vt *Donatistis* nonnullis *Cacilianum* orthodoxum Episcopum *Carthaginis* apud eum multorum criminum accusare cupientibus, singulari cum æquabilitate responderet (*Petitis à me in saculo iudiciū, cum ego ipse Christi expectem iudiciū?*) darētq; eis Iudices, *Maternum Agrippinensem, Rheticum Augustodunensem* Episcopos; atque *Miltiadi* Episcopo Romano scriptis literis huius causę cognitionem, vt propriam commendaret. Cum autem *Cacilianus* Episcoporum iudicijs absolutus esset; *Donatistæ* iterum ad *Constantinum* reuersi, causam hanc neque totam auditam, neque ritè iudicatam conquerebantur. Quare, vt nouo cum iudicio committeret, postularunt. Itaque *Con-*



*stantinus* alterum iudicium hâc de re indixit, aliósque multos Episcopos ad hoc negotium conuocauit. Episcopi, causâ cognitâ, *Cacilianum* iterum innocêtem pronunciant. Eâ re perculsi aduersarij *Constantinum* denuò appellant, eâque rem vt ipse cognoscere velit; orant. Cùm ille postulatum huiusmodi reiecisset, ac talem cognitionem vt parùm homini Laico conuenientem repudiaffet : tamen ad extremum vehementibus eorum flagitationibus victus cessit, & ab Oriente primò *Romam*, deindè *Mediolanum* ad hanc litem dirimendam iter fecit; vbi causâ demum cognitâ, *Cacilianum* innoxium, aduersarios improbissimos pronunciauit, ac res eorum fisco addixit.

In quâ historiâ tria mihi videntur ad nostrum propositum maximè consideranda : Iudicium sanctissimi Christianissimique principis, quo personarum Ecclesiasticarum causas Episcoporum cognitioni delegandas censuit : Laboris, itinerisque tolerantia ad innocentiam Episcopi manifestandam, cùm ex superiorum Iudicum sententiâ *Caciliano* falsa crimina intentari crederet : Summa denique seueritas in illorum accusatorum malitiâ coercendâ, quos iniustissimis calumnijs venerandum patrem afflixisse perspiceret.

Aliud etiam audite tam magni, tamque pij Imperatoris factum. Dum coge batur *Nicenum* Concilium; fuere, qui vnitatis Ecclesiasticæ perturbandæ causâ, Libellos accusationum aduersus coepiscopos *Constantino* obtulerunt, & qui neglectâ causâ religionis, hoc potissimùm agere videbantur. Itaque *Diuis Constantinus*, quò malum illud prohiberet, diem statuit; ad quam vnusquisque, si querelam aut accusationem instituere vellet, conueniret. Igitur allatos Libellos proprio lino, propriâque cerâ consignauit : deinde



de in medio conuentu, sacramento præstito se eos non inspexisse; *Quia Dei optimi maximi & beatorum Pontificum, non etiam mea hac notio & animaduersio est* (inquit) *atque adeò non expedit crimina ac iurgia Presbyterorum innotescere, ne plebs ad delinquendum propterea audacior fiat; Libellos eos omnes comburi, & accusationes aboleri iussit. Quin imò & illud addidisse dicitur, Si Episcopum in adulterio deprehendisset, se occulturum eum suâ purpurâ, ne ab alio animaduersus exemplo magis, quàm factò noceret.*

Omnium etiam historicorum scriptis tritum est illud *Ambrosij* facinus in abstinendo (vt tunc loquebantur) Theodosium Imperatorem propter homicidium. Quam viri sanctissimi castigationem nec tam patienter pertulisset inuictus princeps, nec tantâ cum humilitate scelus suum expiaffet; nisi putasset illius authoritatem verbo Dei septam fuisse & communiam.

Sed hîc infinitus esse posset, quicunque in historijs vel mediocrem diligentiam posuit. Quippe illud *Pauli* præceptum non plebi tantum, sed & principibus Christianorum semper fuit religiosissimum, quo nobis obedientiam imperauit erga illos, qui curam animarum nostrarum sibi commissam retinerent. Ita vt non Paganorum tantum, sed & multò magis Iudæorum veterum, Christianorumque obseruationem hanc constantissimam perpetuamque fuisse videatis; vt ad nomen quasi atque nutum sacrorum pontificum suorum contremiscerent; & tum denique vel publicarum vel priuatarum rerum expeditionem rectè susceptam esse crederent, cùm eam intelligerent Antistitum sententiâ comprobari.

Atque hoc certè summâ ratione non caruit. Vt etenim numen aliquod non esset, quod hanc mundi fa-



bricam, hominúmque actiones suâ potentiâ regeret ac disponderet (quemadmodum nimis multi nunc dicunt perniciosè, falsòque blasphemantur:) nihil tamen est, quod hominem in officio faciliùs continet, vel inde aberrantem in gyrum rationis citiùs reuocat, quàm opinio illa, quam de iusto summi Moderatoris iudicio retinemus; & illa admiratio, quam de illius Sacerdotibus atque ministris ipsa Conscientiæ vis omnium mentibus insculpsit. Idque nullo argumento manifestiùs, quàm ex improbissimorum hominum consuetudine apparet. Detur enim sicarius omnium profligatissimus perditissimúsque; ille in venerabilis cuiusquam ministri commercium tractus, personatam statim grauitatem induit, & vel miram sanctitatem confestim simulat, vel ad minus efferatos prauitatis suæ impetus ad tempus sic temperat atque cohibet, vt iustæ reprehensionis causam in illo non inueneris. Quod profectò non faceret, nisi mentem eius aliqua Numinis opinio imbuisset, contumeliásque ministris suis factas ipsum pertingere firmissimè crederet.

Vnde mihi *Iohannes Bodinus* multùm placet, qui *malam, quàm nullam religionem præstantiorem* esse dicit. Vt etenim illi verè dicant, qui malam religionem animarum nostrarum salutem nihil promouere asserunt: multùm tamen illa conducit ad communem tranquillitatem pacémque Reip. Siquidem si sic nobiscum comparatum esset, vt nec diuini iudicij timore, nec religionis conscientiâ percelleremur: quis est omnium, qui domum non haberet clausam pudori & sanctimonix; patentem atque adeò expositam cupiditati & voluptatibus? Quis, qui rem domi angustiorē sentiens, ab alienis pecunijs manus detineret? Quis, qui ad cruentissimam leuissimarum iniuriarum



rum vindictam cursu incitatissimo non contenderet? Quis, qui frugalitati luxum, modestiæ rapinam, disciplinæ confusionem non anteponeret? Boni etenim & mali distinctionem religio primùm induxit, quâ carentibus nobis, vel non commotis; nec rectè laudabilésque actiones voluptatem aliquam afferrent, nec iniquæ pudorem. Hinc etenim fit, quòd bonis illam pacatissimam animi tranquillitatem atque *amabilem Sto-*  
*ici* tribuant; quòdque furijs infernis improbos & iniustos agitari poetæ fingant; quia illi rectè factorum suorum iucunditate perpetuò delectantur; hij continuis malæ conscientie moribus corroduntur, nequitieque suæ quotidianâ recordatione miserrimè cruciantur.

Quamobrem Paganos suis *Pythijs, Flaminibus, & Sacrificulis*; Iudeos suis *Pontificibus, Sacerdotibus, & Levitis*; Christianos *Archiepiscopis, Episcopis*, reliquisque Ecclesiæ ministris non sine summâ consideratione tantos honores exhibuisse conspiciamus. Siquidem cùm barbarissimas, incultissimasque omnium nationes quædam religionis vis & *impyetia* ad diuini Numinis timorem & cultum excitauerit; tum isti non aliter, ac si mediæ cuiusdam nature essent, & apud Numen hoc pro populo semper intercedere putentur, & populo illius adorandi pacandiq; rectam rationem atque formam præscribere. Nam non solum omnia bona cœli-  
tus profluere, sed etiam tanquam per horum manus ad se deriuari firmissimè credunt. Illis igitur humaniter tractatis, Numen hoc pacari putant: grauiùs exulceratis, ad iracundiam & vindictam prouocari.

Ita vt nequissimus ille *Nicolaus Machiavellus*, qui religionem ad appetitus & ambitionis normam inconstantissimam semper flectit & intorquet; sanctissimam tamen pietatis speciẽ non solum morũ suorũ fictione,  
sed



sed bonorum hominum commercio Principi simulandam esse prædicet: Quia hunc religionis contemptum tanta statim dissolutio subsequatur; quanta publicæ tranquillitatis vincula perfringit, plebique in horrendam imperij distractionem tanquam regiam viam patefacit.

Videtis igitur (eruditi iuvenes) *Martinus* hic non solum quantum ab hominum religiosorum pietate deflexerit; sed ipsorum <sup>ad idem</sup> impietatem quàm immensis spacijs superauit. Non etenim ille satis esse existimat, vt nouæ suæ, & apud Maiores nostros nunquam nominatæ disciplinæ iactatione sibi placeat; nisi etiam in sacrorum Præfulum vitas inuolet, ipsorumque existimationem perditissimis suæ sectæ nebulonibus deridendam turpiter exponat.

Quæ dementia sua, non adhuc dico, quàm impudicè in sacras scripturas & integerrimas Theologiæ regulas deliquerit; sed ab vſitatâ vitæ ciuilis consuetudine, quàm imprudenter aberrauerit. Siquidem exempla cunctarum penè nationum superius recitata demonstrant, ab honore religiosorum hominum ipsam religionem magnâ ex parte dependere, plebémque exemplis sacerdotum, quàm doctrinâ, multo vehementiùs commoueri.

Sed *Martinus* cùm Antichristianam hanc (si Deo placet) Papistarum hierarchiam cum ipso solo coæquandam duceret, idque suggerente nouo quodâ spiritus instinctu: non illud faciliore ratione perfici posse existimauit, quàm imitatione disertissimi viri *Cælij Secundi*, qui *Pasquinum*, id est, hominum *Romanensium* sordes conflasse, & in lucem emisisse creditur. Huius etenim exemplo *Martini* defensores mordicus adherescunt; & nostros Præfules, (qui omnes *Pasquinum* summâ cum delectatione legerunt & exosculati sunt) affirmant



affirmant *Martinum* non sine summâ iniuriâ respuere. Quippè idem vtriusque scopus, eadèmq; hunc scopum attingendi ratio.

Non inficior illam esse generis nostri, nescio dicam imbecillitatem, an malitiam; vt nimis sollicitè delicta illorū speciosis nominibus conemur obducere, quos in partes nostras propendere cernimus. Sed vt verè dicam, quod sentio, idque bonâ cum veniâ viri illius longè doctissimi, cui fama communis *Pasquinum* affingit; illa personarum exagitatio, quâ *Pasquinus* vtitur, via ad religionem omnium est non impeditissima solùm, sed etiam pessima atque iniuriosissima. Nam si ad fidei orthodoxæ propagationem personales inuectiones prodesse fatebimur; non solùm *Christiani* Paganorum, vel Orthodoxi *Iudaorum* vitas reprehendent; sed & spurcissimi omnium, qui esse possunt, hæretici, cùm veram religionem singuli præ se ferant, falsissimas virorum sanctissimorum criminationes persequentur; aliquos etiam eorum, qui cum veris professoribus ambulant, conuitijs suis obuios & apertos reperient, quorum mores inquinatissimi iustissimum scandalum Ecclesiæ Christianæ procreabunt.

Quapropter Episcopi cuiusdam nostri, quamuis aliàs doctissimi sanctissimique viri, sententiam nullo modo comprobare possum, qui non ita pridem *Pasquinos* istos non omninò reiiciendos esse dixit; sed parcè quidem, & solùm in interregno tolerandos. Cuius assertionis quia satis dignam rationem assequi non possum, nunc eam sicco pede præteribo. Tantùm hoc dicam, hunc plātandę fidei modum ab ipso *Christo* & Apostolis totaque ecclesiâ primitiuâ abhorrentem fuisse & alienam. Sanguis enim Martyrum semen est Ecclesię. Nec ad stabiliendam fidem Christianam tantum vnquam valuit vel potentissimorum Regum ærarium, vel bellicosissimorum Imperatorum virtus,



vel legionum cohortúmque; auxilium, vel prudentissimorum Senatorum cura, vel disertissimorú virorum eloquentia; quàm pauperum, quàm nudorum & inermium, quàm plebeiorum simplicissimorúmque; hominum constans dolorum, atque adeò mortis acerbissimę tolerantia & perpassio.

Sed si *Pasquino* cæterisque eiusdem farinae libellis locum aliquẽ concederemus; negamus tamen hinc ad *Martinũ* ius aliquod descendere. Quippe *Pasquinius* in generali quadã temporũ reprehensione totus collocatur; personarũ, quę tunc viuerent, multò minùs quę cum Magistratu essent; vel leuem descriptionem aliquam nusquam tenet. *Martinus* si hysce Cancellis se continuisset, locum aliquem apud viros non malos meruisse poterat: Sed cùm nec religioni, nec innocentie, nec dignitati parcat illorum hominum, quos à disciplinã suã putat alieniores; utcunque apud tristes illos ac austeros rerum nostrarum animaduersores applausum aliquem reperiat; æquis tamen æstimatoribus iustissimum stomachum necessariò commouet.

Quippe obliuiscamur ad tempus illam charitatis normam, ad quam singulæ Christianorum actiones componendæ sunt; quid tamen vel ad communem disciplinam peius, quid ad exemplum perniciosius esse potest, quàm illorum hominum despiciatio & contemptus, quibuscum vniuersa Resp. stat atque cadit? Inde *Thersites* apud *Homerum* non solum corpore vastissimus, sed animo etiam deprauatissimus esse fingitur; quòd Imperatorum, qui curam eius exercitus splendidissimi gerebant, consilia detrectaret, & in illius belli duces non solum gloriam, sed & salutem patriæ suę cogitantes, petulantius inueheretur. Fingamus non vnum, aut alterum; sed omnes gregarios in *Thersitis* peruicaciam descivisse: non solum post no-

num



num iam annum *Troiam* integram & intactā reliquissent; sed singuli, excusso sibi disciplinæ iugo, turpissimam hostium barbarorum seruitutem subiuisent.

Præterea *Martinus* Accusatorem se fortasse profiteretur: cuius generis homines ut vulgo sint odiosiores, quod nemo ferè sit, qui securam delinquendi libertatem sibi ipsi non expetit: necessarium tamen & utilem habent locū in omni Repub. Nisi etenim supplicij metus improborum hominum audaciam paululum cohiberet; & aliqui essent, qui hoc deferendi munus in se susciperent: prauæ nonnullorum cupiditates nusquam consisterent, sed quotidie magis incēderentur, non solum ad priuatorum detrimentum, (qui potentiorum iniurijs plerūq; exponuntur;) sed sæpè etiam ad perniciem & interitum totius ciuitatis. Hoc equidem ex omnibus singularum nationum historijs est exploratissimū, ita ut exempla potius ad euitandum fastidium hīc prætermittenda censeam, quàm ad rei tam claræ testimonium repetenda.

Hoc quidem verissimum esse confitemur: ita tamen, ut *Martinus* elargiatur hoc Accusatorum genus necessarium esse magis, quàm honestum; Siquidem miserum ex alienis iacturis lucrum sibi quærissent; nec tam odio vitiorum, quàm priuati commodi violentissimā quadam ac desperatā siti ad hoc sugillandi munus impellantur: Sic ut *Titus* Imperator clarissimus, delatores, qui propter prædam alios accusarunt, cæsos flagellis aut fustibus deportari iusserit. *Martinus* igitur, si in ieiunum Informatorum cætum cooptari cupiat, (adhuc etenim non propter malitiam, sed inscitiam suam illo commercio videtur esse indignissimus) quoniam omnis cura famæ & estimationis iam illi deponenda sit, & lucri vndecunque conquisiti ratio gnauiter ineunda; monen-



dum hominē esse censeo, Primū, ne falsam inuidiam conflēt hominibus innocentissimis, eos iniuste criminando. Quippe hic labor exitum plerunque sterilem procreat & infrugiferum, quod piorum hominū sanctimoniae calumniae mendaces diu non adhærescant; sed in ipsum calumniatorem nudā tandem & inutilem cum ignominia reuertantur. Deinde, ne hominem in delicto deprehensum statim in lucem efferat & præcipitet; sed, ut mysterium in inis præcordijs reconditum sepeliat atque comprimat; ne forsan aliquis alius eiusdem farinae nepos vel accusationem suam penitus anteuertat, vel saltem sese immiscendo prædæ particulam aliquam sibi corrodat.

Sed ut hæc omittamus, istæ libellorum proiectiones non solum ad illorum hominum dignitatem comminuendam, sed statum etiam euertendum, sine quibus Respub. eadem, quæ nunc est, permanere non potest; & mutationem inducunt, à quā nunquam abest periculum; & subitam rerum perturbationem, quam foelix euentus nunquam adhuc est consecutus. Atque huius rei in exemplum, iuuat *Romani* quidem imperij multiplices anfractus & statum inconstantissimū breuiter vobis ob oculos proponere, ut in illo tanquam in clarissimo speculo conspiciatis fructus illos, qui ex temeraria rerum mutatione proueniunt.

Ac primò ut illud *Tarquiniorum* exilium tam tyrannicæ potentiae, tamque immanis flagitij iustissimam vindictam fuisse non negemus: cum tamen sub prætextu libertatis, quidam non solum familiam *Tarquiniorum* extirpandam, sed & Regum nomē è medio tollendū esse ducerent, priorēmq; Reip. formam cum Aristocratiā commutandā: non sine horrore considero, quā inexpectatæ tragoediæ, quā acerbi tumultus, quā truculētę strages subsequutę sunt. *Tarquinij*  
etenim



etenim tam cōtumeliosam repulsam nō ferentes, exterarū nationū imploratis auxilijs, ciuitatē primò oppugnarūt, deinde obsiderūt, nec inde tandē sine multā Romani sanguinis effusione pellebātur. Quibus penitus fufis & euersis, maxima pars calamitatis adhuc superest. Cū etenim Optimatum statum instituisent; leges, quibus prius regebantur, huic nouæ rerum faciei non cohærentes abrogandæ fuerunt, aliæque forinsecus mutuandę; sacrificiorum non ritus solum, sed & ministri commutandi; noui magistratuum ordines excogitandi creandique. Quarum rerum quanta fuerit difficultas, quāque anxia sollicitudo, non est cuiquam facilè conijcere, qui illam non degustauit. Sed cū hæc omnia multis annis vix perficerentur, & noua iam esset forma ciuitatis; num hīc molestiarum tot tantarūmq; finis aliquis aut modus repertus est? Imò verò non multum fluxit temporis, cū Consules plebem in officio continere non valentes, Dictatorem semestrem creare cogerētur. Cuius summa authoritas tanti apud populum momenti non fuit, quin etiam propter iniquam frumentorum diuisionem, partitionēque agrorum, plebs in molem Auentinam secederet, resque nouas medicaretur. Postea verò *Tribuni* ad propugnandam plebis auctoritatem constituti, (paucorum dominatum iam in Democratiam vergente) tam atroces seditionum faces sæpè accenderunt; vt periculum esset, ne ciuitas illa, propter externas victorias omnium quæ vnquam fuerunt, celeberrima, domesticis ac intestinis discordijs rueret quotidie, & collaberetur. *Cæsares* tandem rerum summam adepti, in restaurandā Monarchiā, plebēque deprimendā quantas tragedias excitarunt? Quā immensam pecuniarum vim exhauserunt? Quā ingentes ciuium multitudines huius vitæ iu-



cundissimâ luce priuauerunt?

Ista igitur qui rectè ponderauerit, non multum admirabitur, cur politici tam facilè resoluant *antiquas leges deteriores nouis melioribus anteponendas*. Siquidem consuetudinis maximæ sint vires, antiquitatque sui reuerentiam quandam & admirationem in omnium mentibus imprimat: res nouæ non solum contemptui sunt plerunque, sed sæpissimè etiam speciosas magis, quàm veras emendationes polliceantur. Bene igitur monet quidam, *non statim abolendam esse legem, si expeditam eius rationem non perspicias: sed diu potius expectandum, si manifestam aliquam eiusdem utilitatem experientia prodiderit*.

Atque igitur non tam situs ciuitatis, quamuis naturâ suâ munitissimus, tam perpetuæ constantiæ causa in *Venetianâ Rep.* fuisse creditur; quàm illa constitutio, quâ sancitum est, legis cuiusquam nouæ ne mentionem quidem faciendam apud Senatum (quem illi *Consilium grande* suâ linguâ vocant) nisi consensu sapientum (quos appellant) implorato prius & obtento. Summa etiam ratione fulciebatur ille mos *Locrensum*, apud quos vnusquisq; nouam legem rogaturus collum suum resti circumdedit, sicque in Senatum veniens suffocabatur, si petitione suâ caderet. Hac autem in re nulli vnquam seueriores fuerunt, quàm *Lacedæmonij*, qui à studio Nouitatis sic abhorrebant; vt *Tybandrum* musicum illius ætatis longè præstantissimum, quòd vnicam cordam instrumento cuidam musico addidisset, contuso prius instrumento, miserint in exilium.

Quapropter tantò minori dignum est admiratione, quod de *Anacharsi* philosopho, deque *Scyle Scytharum* Regis filio refert historia; qui, quòd ad morem *Græcorum* festa celebrare *Scythas* docerent; ille à *Santio Scytharum*



*Scytharum* Rege sagittâ transfixus; hic primùm à suis desertus, postea etiam à fratre interemptus est. Nam hæc priscorum facinora non solùm cum *Pyndaro* affirmant Consuetudinem mortalium esse iudicem vel Regem: sed etiam in omni Rep. vel rerum minutissimarum alterationem non sine maturâ deliberatione permittendam.

Atque hoc si in *Martinistis* istis, cùm primùm emergerent succidendis, sacri nostri præsules obseruassent; illorum simulata humilitas in tam desperatam audaciam, audacia in tam execrabilem impietatem, impietas in tam funestam Reip. nostræ perturbationem nunquam excreuisset.

Sed ab hoc cursu disceptationis tam solenniter instituto *Martinum* iamdudum me reuocantem audire videor, & apertis faucibus clamantem, hæc omnia, quæ de nouarum rerum inductione dixi, à proposito nostro prorsus esse aliena. Siquidem vt vera sint in legibus res externas fortunâsque tantùm nostras tangentibus, quæ Magistratus arbitrio ac voluntati subiiciuntur, atque igitur rebus ita postulantibus retineri vel mutari sine scelere possunt: in Religione tamen non item. Nihil etenim est turpius, quàm cultum diuini Numinis tanquam *Lesbiam* regulam, Rerumpub. formis coaptare; vel personis, temporibus, locisue componere. Nam vt *Christus* vnicus est, & vnica *Christianorum* fides: sic etiam visibilis Ecclesiæ facies vbique debet esse eadem, quam ab ipsis Apostolis, & à primis illis Architectis deriuatam accepimus. Cùm etenim in templo illo *Iudaorum* describendo Deus tam sollicitus fuerit, vt ne minima quidem eiusdem utensilia prætermiserit: tum verisimile est nostræ structuræ multò præstantioris, augustiorisque formam illum non sic neglexisse,



lexisse, quin etiam absolutissimam eius effigiem in nouo testamento delineauerit ac depinxerit.

Primò consequentiam istius argumenti (quod tanquam Idolum *Martinista* suspiciunt & admirantur) debilem & infirmam esse plus millies Orthodoxi demonstrarunt; nos etiam alibi demonstraturi sumus. Deinde nullam aliam rerum administrationem vnquam in Ecclesiâ Christi obtinuisse, quàm quæ nunc apud nos obtinet, confidenter affirmo. Nam non solum authorem nullum, sed ne lineam quidem probati cuiusquam scriptoris potest mihi *Martinus* afferre, quâ ministrorum æqualitas apud antiquos Christianos comprobatur: & mihi *Patriarcharum, Archiepiscoporum, Episcoporum*, non solum dignitatem & auctoritatem illam, quam nostri habent; sed & multò celsiorem illustrioremque (respirantibus iam paululùm à Tyrannorum persecutione Christianis, rebûsque illorum aliquantulum confirmatis) statim in usu fuisse, sexcenti plus historiographi astipulantur.

Sed vt hoc verum non esset, quod omnium penè infantissimis constat esse verissimum: falsis tamen accusationibus, & ne accusationibus quidem, sed malitiosissimis calumnijs nouam doctrinam commendare, sine tùm profligatæ prauitatis, tùm amentissimæ stultitię suspicione nemo potest. Vt cunque etenim in insulsam inuidamq; dignitatis plebem tam petulans maledicentia possit influere: literati tamen & sapientes optimè sciunt rerum præstantiam in suâ virtute consistere, non aliarum comparatione trutinari: Neque illud solum, sed etiam nulla tempora tam sancta, tamq; defecata vnquam extitisse; quæ non veris germanisque Christi professoribus aliquos etiam hypocritas immiscuerint. Numerabatur inter discipulos *Iscaiotes*; etiam *Ananias & Saphira* inter fratres locum habebant.



habebant. Ita vt si nullam religionem rectam esse confiteremur, quam impuri aliqui consecantur; sanè delendum esset Religionis nomen, & illi omnium beatissimi iudicandi, quos nec Numinis cuiusquam opinio, nec pietatis cura sollicitos vnquam tenuit. Quid? *Martinista* omnes tam synceri, tam puri, tam innocentes, vt nullum crimen in illâ sectâ liceat reprehendere? Dicam (quæso) quod sentio: Si tantum duo sint alij, qui cum *Martino* in dispergendis istis libellis conspirauerint; non dubito tres illorum ad minus absolutos & confirmatos esse Nebulones. Ponamus igitur aliquos Episcopos esse malos, (quod ego tamen de priuato aliquo, nisi iam conuicto legitimèque condemnato, non crederem) hinc statim concludemus Episcoporum statum mox è Repub. deque Ecclesiâ Christi deturbandum? Eâdem certè ratione Magistratus, Reges, Imperatores solijs suis atque sceptris spoliandos dixerimus, quòd nulla autoritas, vel iustissima, inter homines erecta vnquam fuerit, paulòque diutiùs constiterit, quam aliquis non malè administravit, & ad inexplabilem libidinis suæ sitim restinguendam non distorsit.

Ista mihi diu, multumque cogitanti, nulla vnquam vel ad dignitatem principum ornatio, vel ad salutem certior gubernandi regula dari videtur; quàm illa, quæ singulas ad illos vias Sycophantis istis obstruit & præcludit. Illi etenim vtcunque omnia ad voluptatem assententur; & ad nutum principis, vultum, oculos, gestumque componant: mentes tamen gerunt semper virulentissimas, & tanquam in excubijs ad arripiendas singulas ansas damni, quod possunt, infligendi collocantur. Cùmque astutiæ suæ viribus Regis animum à veris amicis subditisque fidelibus alienauerint; tum confestim in ipsius statum cuniculos agunt,

D.I.

eum



eúmque iam vacillantem, quibus possunt machinis, student euertere.

Atque igitur non dubito (utcumque *Martinus* híc escam *Marco Crasso*, vel cuiquam auaro principi gratam præbuisse) *Elizabetha* nostrę non solum integritatem sanctiorem, sed & prudentiam multò perspicatiorē, magnanimitatēque splendidiorē esse; quàm quæ tam fucatis illecebris deliniri possit. Illa etenim, illa pro summis ingenij sui virtutūque omnium dotibus ignorare non potest, in concinno Prælatorum decore quantum sua Religio; in venustâ Spiritualium hominum distinctione quantum sua sapientia; in moderatis Ecclesiæ copijs quantum sua beneficentia lucet, & effulget. Nec etenim tam in arcarum suarum pondere, vel multitudine prædiorum; quàm Reip. piâ, prouidâ, splendidâque moderatione vires suas constituit.

Quapropter desinant isti *Brachmanna* nescio qui, theologiam hanc non nudam tantum, sed & excoriatam iactitare: desinant temporalium illorum, quæ Episcopalis adhærescunt, odiosam distractionem toties inculcare. Siquidem istiusmodi vociferationes crudelissimos tyrannos efferare; bonorum principum animos ne quidem commouere solent.

Sed dixerit mihi politellus aliquis; *Martinum* exagitando nimium te fatigas (homo simplicissime) sollicitēque umbram verberas, nec intelligis horum temporum hanc esse prudentiam longè exquisitissimam, ut Religionis sectam quælibet Respub. nutriat, atque foueat. Nam confligentes inter se Ecclesiasticos, nec solum de doctrinæ suæ veritate digladiantes; sed & in morum atque vitæ mutuas reprehensiones prorūpentes, Laici & facillimè semper tractant, & in nequissimarum suarum designationum tolerantiam expedit.



peditissimè traducunt. Cùm etenim publica salus multa flagitia verbo Dei prohibita statim admittat, atque deuoret; Et Sacerdotes à Dei partibus nimis obnixè semper consistere soleant, eiúsque sortem strictè defendere: Sic contrectandæ sunt illorum mentes, vel sic temperandæ potiùs illorum facultates, vt nostris quibuscunque conatibus multùm resistere nec velint, nec possint. Secùs verò quædam pietatis superstitio, non solùm vias omnes ad voluptates atque libidines hominibus potentioribus sæpè præstrueret; sed etiam Rempub. hostium incursibus, perduelliumque technis & insidijs abiectionissimè prostitueret. Tu igitur, qui *Martinum* tam grauitè increpas, vide ne non tam priuatum aliquem sectarium reprehendas, quàm consilium ac institutum multorum hominum in controuersiam voces. Nam depositâ iam pridem omni religionis curâ apud externos, vicinísque nostris in possessiones nostras per fas atque nefas quotidie irruentibus; non iam tandem Theologorum expectanda nobis sunt oracula, si intra pietatis moenia, limitésque dimicemus; sed aures cuiuslibet accommodandæ potiùs, qui tutissimam, non sanctissimam defensionem pollicetur. Hoc autem nullo modo fit melius, quàm sic distrahendo illorum animos, qui Religioni præsunt, vt mutuis diffidijs fatigentur, non publicis regni consilijs occupentur.

Credideram iam pridem mortuum fuisse *Nicolaum Machiauellum*; sed viuus fortasse descendit ad inferos, & spiritum suum conduplicatum in istos politicos descensurus contulit. Nam ille principes religionem contemnere docuit: hij non illud solùm, sed & rectissimam artificiosissimamque contemnendi rationem aperiunt. Qui quidem vtinam tam diabolicæ



suæ opinionis defensorem *Iohannem Bodinum* non haberent. Quippe homo nostrorum temporum longè doctissimus hic blasphemam impietatem eructat, & Reip. suæ salutem diuinæ prouidentiae ereptam, inanissimis prophanorum hominum cerebris protegendam committit. Nam binarum religionum tolerantiam principis securitatem potissimum continere vociferatur. Quæ vox & cultum diuinum flexuosissimâ nostrarum actionum normâ mensurat, quo nihil scelestius: & ipsum Deum secundarijs causis astringit, quo nihil ineptius vnquam cogitari potest. Quid ni igitur siue teporem, siue diffimulationem huiusmodi tanquam execrabilem procul à nobis arceamus; vel potius in remotissimas ipsius *Tartari* regiones, tanquam in propriam ac natiuam sedem amandemus? Vnicus est Deus, vnicus illius cultus ab illo nobis, non à nobis illi præscribendus: à quo qui per ignorantiam aberrat, culpâ non caret; sed qui per malitiam scienter ac sponte deflectit, statu quidem vacillat iam desperatissimo.

Infinitus esse possem in recensendis exemplis hominum inermium, qui diuinis mandatis obsequuti, fortissimos infidelium exercitus fuderunt; & potentissimorum Imperatorum, qui Domini præcepta cum suis inuentis nunc miscendo, nunc commutando, turpissimam seruitutem obiuerunt. Sed res est apertior, quàm vt dubitationem aliquam ferat; præsertim nobis *Anglis*, qui tam confirmatam & diuturnam pacem, tantam tamque inauditam triginta annorum fælicitatem, tam illustres, admirabiles, & vix optandas victorias non hostium nostrorum imbecillitati, non nostris viribus; sed soli Deo, puræque veritati religionis cogimur ascribere. Non desunt exteris Regibus consiliarij prudentissimi, non desunt cohortes bellicosissi-



licosissimæ; diuitiæ etiam abundant, & omnis generis commeatus. Nos autem pusilli in solo Deo confidimus, & tanquam in somno vincimus.

Pudeat igitur *Martinistas* hac labe Magnates nostros aspergere: siquidem ipsi magnum aliquem defensorem suæ vesaniæ non habeant, nisi aliquem fortasse, qui illorum stultissimas ineptias sibi in turpissimum lucrum cupit conuertere. Sed si neglectâ religionis normâ, doctrinæ huius sanitatem ad humanæ politiæ calculos reuocemus; religionis varietate nihil est cuiquam Reip. periculosius. Quippe quæ non ipsa solum tumultibus semper est proxima; sed & hominibus paulò seditiosioribus facillimas commotionum anfas plærunque præbet. Ambitioso etenim cuiquam ad regnum vel status mutationem contendenti nihil est expeditius, nihil oportunius; quàm sanctitatem simulare, religionis integritatem præ se ferre, sicque quasi nutu suo vel suppositione pedis sectam illam, cuius defensionem profitetur, excitare; & sceleratas suas designationes prætextu pietatis dissimulare. Atque hæc de primâ parte dicta sint.

**A**CCEDAMVS nunc ad secundum diuisionis nostræ membrum, & ostendamus hunc mirificum emendatorem leges omnium laudatarum Rerumpub. quæ vnquam fuerunt, impudentissimè violasse; nec solum perpetuam infamiæ maculam inde contraxisse, sed in pessimi cuiusque supplicij periculum se coniecisse. Hoc autem vt vobis sit perspectissimum, paulò altiùs rem mihi repetendam esse video. Scitote igitur iniuriarum actionem *Martino* nos intendere. Duplex autem est iniuria: generalis altera

D.3.

atque



atque laxior, quàm *Græci* <sup>διόμην καὶ ἀδινίαν</sup> appellant; altera strictior & vehementior, quàm illi <sup>ὑπερ</sup> *Romani* *Contumeliam* dicunt; quia non solum leges, & Iusti cancellos transit; sed dedecus etiam & contemptum patienti infligit. Illam faciunt omnes, qui facultates nostras minuendo legum septa violant: hanc illi soli, qui nobis famam atque existimationem etiam cum indignitate detrahunt. Exempli causâ, qui rem meam mihi suffuratur, in leges atque iustitiam committit: hoc tamen sine personæ vel conditionis meæ contumelia facit; atque igitur generali modo dicitur iniustus. Qui vel vulnera mihi dat, vel ignominiosè me compellendo laceffit; hic (secundum Iurisperitos loquor) specialiter iniustus est, <sup>καὶ διὰ τὸ τὴν ὑπερ προσεῖν, ὑπερσῆς</sup> propriè dicitur. Hanc illâ alterâ tetriorem esse quis non videt? Siquidem illa partem aliquam rei familiaris atque copias tantum diripit; hæc decus, nomen, honestatēq; lædit. Meritò igitur *Isocrates* à *Lochite* vapulans idem supplicium de læsione corporis sumendum esse negat, quod de fraudatione pecuniarum sumi solet. Hoc etenim omnibus esse coniunctissimum, eiusque ob incolumitatem & leges præcipuè sancitas esse, & bella quotidie suscipi. Quod autem Orator ille summus pro loco & tempore soli corpori astrinxit, mihi videtur ad personæ famam & dignitatē multò magis pertinere. Nam corpore nostro percusso vel vulnerato, non tam ictus magnitudinem spectamus, quàm personæ nostræ iniustam contumeliam. Nam casu vel per imprudentiam collisi leuius commouemur nonnunquam; per contemptum, non dico, tacti, sed compellati tantum, vehementissimè incendimur. Idque quia non tam facta vindicanda sunt, quàm vniuersa morum petulantia coercenda. Quamobrem *Hortensius* utcūque leui-

tatis



tatis notam non effugit, quòd Collegæ plicaturas togæ suæ perturbanti diem diceret: quia tamen hoc non sine contumeliâ factum est illi, quum ad forum & honoratum confessum se composuisset, solenniorémque de re aliquâ grauiori orationem apud viros nobiles habiturus: rectius iniuriarum actionem illi competiuisse dixerimus, quàm si per imprudentiam ab aliquo deiectus ad humum, pedibúsque conculcatus fuisset. In iniurijs etenim disceptandis illud est perpetuum, vt consideremus, quâ mente illas quisquam intulerit. At quod ignorantia facit, illud præpensam malitiam habere non potest, nisi damnum illatum delectatio aliqua subsequatur, quæ occultam in nobis prodat nocendi voluntatem. Vnde sequitur esse quosdam, qui iniuriam facere non possunt; vtpote furiosos, & impuberem, qui doli capax non est: vt nec qui per iocum percutit, vel hominem liberum occidit, dum putat esse seruum suum.

Hæc autem, de quâ loquimur, iniuria fit re, aut verbis. Re verò dupliciter, vt verberibus, vel gestu. Verbis etiam dupliciter, vt dicto, vel scriptis. Tantòque in odio fuit apud priscos, vt cum duo essent actionum genera; priuatarum vnum, quæ priuato ad-damnum aliquod refarciendum concedebantur; alterum publicarum siue popularium, quæ cuius è populo tanquam reipublicæ nomine competeabant: *Εἰς τὸν ὕψιστον* quidem publica semper intentabatur, quàm Græci *καταπολιτείας* appellarunt, idque nullâ factâ sponsione, siue in litis euentum depositâ pecuniâ, quæ in alijs iudicijs interuenire solet. Vnde meritò in primâ contra *Stephanum* de falso testimonio dixit *Demoethenes* se *δύστω* non potuisse intendere, quia bello *αἱ δυνάμεις* sublatae essent: sed *ὕψιστος* *καταπολιτείας*. Nam è multis *καταπολιτείας* speciebus, *καὶ ἡ πρώτη* vna



yna fuit, quæ definiebatur cuiusdam publici iudicii species, cum vel publico, vel perinde vt publico, quis alterum iudicio persequeretur.

Videtis igitur apud illos omnium *Græcorum* sapientissimos, dignitatis atq; existimationis conseruandæ tam sollicitam fuisse curam, vt in alijs delictis contra priuatum commissis, illi tantum experiri liceret, qui læderetur; in hoc quidem quiuis è populo ius persequi posset, tanquam si tota Resp. inde laboraret. Contumelias autem alias leuiiores, alias atrociores esse oportet. Et illos non est dubium alijs mitiora, grauiora alijs supplicia constituisse. Sed hîc hæremus. Quippe & ipsa vetustas, & tot tantæque rerum perturbationes non solum ipsas leges, sed & singula pene legum monumenta corruperunt. Tantum apud *Isocratem* pro maledicto vnico mulctam quingentarum drachmarum infligi legimus. Cum igitur octo drachmæ vnciam argenti constituent; vnica verò vncia valeat quinque solidos Anglicos; tunc quingentæ drachmæ faciunt in nostrâ monetâ 312. solidos, & quatuor octauas vnius solidi; id est, quindecim libras, duodecim solidos, & sex denarios. Hoc si vnici maledicti precium sit; quid de pluribus? quid de falsis? quid de pulsatione? quid de verberibus, vulneribusq; adiunctis existimandum est? Certè vt *Pythagoras* ex *Herculis* stadio pedem eius, ex pede tibiâ, ex tibiâ cætera membra, atque adeò ipsam corporis staturam eruisse dicitur: non aliter nos certissimis coniecturis vnici maledicti supplicium ad atrociorum contumeliarum poenas longè grauiissimas tanquam manibus poterit conducere.

Dicite mihi iam, si *Martinus* apud *Athenienses* vixisset, & singula maledicta, quibus libellos suos refertissimos videmus, quingentis drachmis lueret: quod patri-



patrimonium, quamuis amplissimum; tot mûltis posset sufficere? Nollem quidem vel *Martiniſtarum* omnium tantas eſſe copias; quia tum non conuicio- rum, ſed ferramentorû, tormentorum, maximarûmq; legionum periculum, non *Episcopis*, ſed *Elizabethæ* no- ſtræ, atque *Angliæ* (prôh malum) ab illis pertimeſcen- dum eſſet, quam illi quotidie nituntur per ſanctiſſi- morum Antitiſtitum latera configere.

Sed obſoletiora hæc relinquamus, & ad ius *Roma- num*, legesque quibus vtimur, propiùs accedamus. Et certè ſi nihil aliud eſſet, quod *Romanorum* animos ad- uerſus huiusmodi Rabulas atq; Scurras nobis oſten- deret: duæ tamen huius iudicij circumſtantiæ hoc optimè depingunt. Primùm etenim in actione iniuri- arum, vt in iudicijs criminalibus, plenam probatio- nem expectabant; cùm in reliquis priuatorum homi- num controuerſijs, ſaltem non nimij præiudicij, cum iuramento partis tantùm ſemiplenam exigent. De- inde, cùm animus atque voluntas iniuriam inferentis perpenderetur; nec quiſquam iniuriam facere iudi- caretur, qui cum dolo & contumeliâ non faceret: hoc etiam apud illos receptum fuit, vt quæuis iniuſtæ vel fatuæ cauſæ allegatio dolum iniuriantis perpurgaret, iudiciûmque aboleret. Vtriuſque circumſtantiæ ra- tionem hanc eſſe arbitror; quòd cùm Condemnatio in hoc iudicio nominis iacturam irrogaret; *Romani* quidem exiſtimationem liberorum hominum tanto in precio habuerunt, vt delicto vindictam apertiffi- mè non flagitante, potiùs abſoluendo binorum ho- minum dignitatem integram ſeruandam duxerint, quàm vnius tantùm reſarciendam, alterius penitus de- perdendam. Illa enim Ciuilis prudentiæ ratio eſt, vt (quantum poſſit) vniuerſæ ciuitati proſpiciat. Illud autè ſi per hominum nequitiam non liceat, vt (ſaltem



saluis iusticiæ neruis, quibus illa solum continetur) quam plurimis consultum esse velit : & tum demum, cum vel plecti ciuem, vel iusticiam violari sit necesse; tardè quidem & inuitò (tanquam medicus ad vrendum atq; secandum) ad animaduersionem austeriorem, imò austerissimam vixque admittendam accedat. Prudentissimis Romanis charam esse liberorum hominum existimationem nihil meo iudicio probat manifestiùs, quam illæ leges, quæ non solum iniuriam patientibus, sed & eorū cognatis & amicis necessarijs iniuriarum actionem concedunt. Nam & sponsus ad hanc, propter contumeliã sponsæ factam, admittitur. Ita vt ex vnicâ iniuriâ tribus interdum actio competat, nec vnus actio per aliam consumatur : vt puta vxori meæ, quæ est filia familiâs, iniuria facta est; mihi, patri eius, & sibi ipsi, iniuriarium actio datur.

Sed istis sic positis, progrediamur iam ad supplicia, quæ leges iniuriantibus infligunt. Hic autem pro circumstantiarum varietate diuersæ considerationes esse solent. Alia enim est leuior (vt suprà dictum est) alia atrocior, prout iniuriandi modus, vel locus, tempusue, in quo fit; vel persona, quæ læditur, videtur exposcere. Atque hoc leges decemvircæ, siue duodecim tabularum satis explicant. Quæ quamuis ipsæ maximâ pro parte interciderint: earum tamen quædam vestigia apud *Aulum Gellium* adhuc conspiciuntur, qui *Sextum Cecilium*, contra facetos quosdam *Phauorini* lepôres earum tabularum sententiam defendentem, inducit his verbis : *Sed enim ipsum vide, quod in iniurias factas quinque & viginti assibus sanxerint* (loquitur autem de duodecim tabulis) *non omnino omnes (mi Phauorine) iniurias ære isto paucò diluerunt, tametsi hac ipsa paucitas assium graue pondus æris fuit. Nam librarijs assibus eâ tempestate populus usus est.*



est. Sed iniurias atrociores, ut de osse fracto, non liberis modo, verum etiam seruis factas, impensiore damno vindicauerant. Quibusdam autem iniurijs talionem apposuerunt. Et paulò post: Si reus, qui de pacisci noluerat, Iudici talionem imperanti non parebat, æstimatâ lite Iudex hominem pecunia damnabat. Atque ita si reo & pæctio grauis, & acerba talio visa fuerit, seueritas legis ad pecunia mulctam redibat.

Sed hæc in desuetudinem abierunt. Non enim ignoramus (ut inquit idem Gellius) legum oportunitates & medelas pro temporum moribus & Rerumpub. generibus, ac pro utilitatum presentium rationibus, pròque vitiorum quibus medendum est, feruoribus, mutari atque flecti, neque vno statu consistere, quin ut facies cæli & maris, ita rerum atque fortuna tempestatibus varientur.

Ex quibus perspicimus non tantum antiquari leges 12. tabularum ab Athenis Romam post exactos Reges adductas; sed etiam ex ipsis temporibus necessarias oriri causas, vel saluberrima sanctissimaque decreta permutandi. Vnde tandem effectum est, ut omnium istius generis iniuriarum vindicta sub Prætoris edicto comprehenderetur; quo constitutum est, ut iniuriam passi eam æstimarent; utq; Iudex aut tantum reum condemnaret, quanti iniuriâ passus æstimasset; aut minoris, si sibi videretur. Verba autem edicti, ex quibus hoc constat, sunt huiusmodi. Si quis aduersus ea fecerit, prout quæq; res erit, animaduertam.

Atq; hinc oriuntur illi gradus iniuriarum, qui poenarum diuersitates inducunt. Non tantum etenim suadet ratio naturalis, sed & experientia docet, contumelias infinitis penè modis minui vel exaggerari. Nam in verborum conuitijs multum interest, quis statim se respiscat, an perseuerauerit; in priuato domicilio coram paucis testibus, an in theatro, multis spectantibus atq;



audientibus scommata iaciantur : Seruus sit, an liber ; Plebeius an Nobilis ; Priuatus an Magistratus ; necessarius an alienus ; qui iniuriam patitur. Illa etenim *Theodosij, Arcadij, atque Honorij* constitutio, quantamcūq; lenitatem atque clementiam præ se ferat : implicite tamen seueritatis iudicium manifestissimum continet. Verba sunt hæc. *Si quis modestia nescius, aut pudoris ignarus, improbo petulantig, maledicto nomina nostra crediderit laceßenda, ac temulentia turbulentus obtreçtator temporum nostrorum fuerit, eum pænæ nolumus subiugari, neque durum aliquid, nec asperum volumus sustinere : quoniam id si ex lenitate processit, contemnendum est : si ex infamia, miseratione dignum : si ab iniuria, remittendum. Vnde integris omnibus hoc ad nostram scientiam referatur, vt ex personis hominum dicta pensemus, & vtrum prætermitti, an exquiri debeant, censeamus.* Vt etenim illorum opinioni potius adhæreamus, qui [remittendum] id est, condonandum dicunt; quàm illorum, qui [remittendum] id est, Prætori supplicij causâ relegandum interpretantur : tamen quòd ad scientiam suam referri Imperator velit istiusmodi homines maledicos ; non ego hoc impunitatis causâ constitutum esse crederem, præsertim cū statim hæc addat, *Vt ex personis hominum dicta pensemus, & vtrum prætermitti, an exquiri debeant, censeamus.* Vtcūq; etenim lenitatem principe dignissimā omnes affirmant, ipsiq; principes omniū maximi clarissimiq; clementiam suis titulis & epigraphis intexuerint : nemo tamē omnium, qui in aliorum iniurijs propulsandis tam est sollicitus, suam dignitatē maiestatēq; tātum negliget & contemnet, vt cuilibet in popinis ac lupanaribus eandem exagitandam permiserit. Illius igitur Constitutionis hanc ego sententiam esse arbitror, vt qui ob quamcunque causam Imperatori maledixerint,



rint, quamuis mortem, aut ad minus exiliū mereātur: quod tamen vnus homunculi maledicta vindicare principis non tantum intersit, quantum insidiarum coniurationūque explorandarum quolibet occasiones arripere; non primo quoque momento istos maledicos plectendos Imperatores duxerunt, sed ad se potius perducendos, suoque arbitratu vel leuiter, vel seuerè pertractandos; vt experirentur an à leuiori aliquo motu, vel occulto malo conuicia processerint. Atque hæc causa est, cur aliquem in apertis insidijs comprehensum non statim interficiendum Principes ducunt; sed ad acerbiora supplicia conseruandum: Quia iam quasi filum habent, quo ad tectioris coniurationis quasi labyrinthum conducantur; quo temere abrupto, *Minotaurum* ipsum non adhuc assequeuti, viam fortè perderent. Quare si verum sit, quod audiuius, satellites Principis *Orangia* non ita pridem in carcerem esse coniectos, quòd coniuratorem pilam plumbeam in eum è bombardâ mittentem in ipsius Principis conspectu trucidassent; non sine summo consilio hoc factum est. Siquidem apud Coniuratores frequentissimum est; eum, qui scelus perpetrandum suscepit, facinore peracto, statim traicere, ne reliquos facinoris sui conscios prodât atque detegat. Atque igitur cū priores insidias Princeps euasisset, alterum simili modo eum aggressum ad poenas exquisitiores (quamuis frustra) viuum reseruarunt.

Vtcunque igitur rebus ita permittentibus nihil sit, quod Principis maiestatem magis augeat, quàm clementia atque lenitas: tamen nemo omnium Reges ita obtusos atque stupidos esse cupit, quin causam & originem maledicentiæ ad ipsorum aures delatæ sedulo quidem perquirant; & deinde, si levis sit, remittant: sin periculosa, tanto puniant vehementiùs,



quanto magis Reip. salus ab ipsorum, quàm aliorum vitâ dependeat. Quid enim? Dissolutior in istos nebulones indulgentia, ciues alios in immodestiam pelliceret, principumque actiones in assiduum opprobrij periculum induceret, illustrissimorumque hominum conditionem infimâ plebis fece deteriorem redderet. Hæc fortasse recens est prædictæ constitutionis interpretatio; sed tamen talis, qualis rationis momento, doctissimorumque virorum autoritate non caret. Cùm etenim leges superiùs allegatæ, multæque aliæ distinctionem iniuriarum inducant, propter personarum differentiam, quæ eas patiuntur: tum quæ petulantior, quæ nequior esse potest, quàm quæ sacram principis personam conspurcat atque violat?

Sed cùm ex inferendi modo contumeliam incrementum capere dixerimus; consideremus, quam rationem *Martinus* hîc sibi potissimùm ineundam esse duxerit. Non temulentiâ ductus ornatissimos Episcopos nostros tam vehementer insectatus est (quamvis si hoc gratum homini foret, illum aliquando temulentum esse non negarem) sed malitiâ, sed dolo potiùs, furiosissimâque calumniandi libidine percitus, viris innocentissimis, etiam in dignitate constitutis, non pepercit. Non enim vnum aut alterum maledictum sibi excidere passus est, sed inuitâ quasi *Minervâ*, nervos omnes intendit, fauces suas impudentissimas defatigavit in illorum existimatione deludendâ, quorum è statu pietas ipsa religiôque non minimè dependet. Libellum iam tertium nuperrimè disseminavit improbißimâ scurrilissimâque nequitiâ plenissimû; plures minitatur, nec destitutum se pollicetur, si non priùs hanc Ministrorum æqualitatem, id est (vt ego interpretor) nudam, sterilem, informem Ecclesiæ nostrę vastitatem, foedissimamque religionis cõfusionem,



& vniuersalē à Christo fidēque defectionē inuexerit.

At quam poenam huic tam crassę, tam impię, non iam dicam contumelię, sed blasphemię leges constituerunt? Sane quidem de tantā tamque exquisitā vefaniā nunquam cogitarunt. Sed libellorum autores iure Pontificio flagellantur. At huius canones contemnunt, dirisque deuouent. Iure ciuili: *Si quis famosum libellum siue domi, siue in publico, vel quocunque in loco ignarus repererit; aut corrumpat priusquam alter inueniat, aut nulli confiteatur inuentum. Si verò non statim easdem chartulas vel corruerit, vel igni consumpserit; sed vim earum manifestauerit: sciat se quasi authorem huiusmodi delicti capituli sententia subiungendum.* Item alibi. *Si quis librum ad infamiam alicuius pertinentem scripserit, composuerit, ediderit, doloue malo fecerit, quo quid eorum fieret: etiamsi alterius nomine ediderit, vel sine nomine; iubetur ex lege esse intestabilis.* Eādē poenā tenetur is, qui <sup>omni ex-  
mpti</sup> aliuduc quid sine scripturā in notam aliquorum produxerit. Iniuriarum etiam condemnatum infamem esse tam leges, quàm doctores vbique prædicant. Leges etiam istas non tanquam gladium in vaginā reconditum sopitas iacuisse, sed vsu perpetuo quasi coruscasse multorum historicorum libri satis indicant. Quibus testibus *Augustus* famosorum libellorum, quos ad traducendos homines à quibusdam scribi acceperat, inquisitionem fieri, & repertos in vrbe ab *Aedilibus*, extra urbem à singulorum locorum præfectis comburi iussit; atque in autores animaduertit. *Domitianus* etiam huiusmodi scripta, quibus primores viri atque fæminæ notabantur, aboleuit, idque non sine autorum infamiā. Etiam asperiores se præbuit in *Hermogenem Tharsensem* Historicum, quem ideò vltimo supplicio affecit, quòd in historiā suā figuratis quibusdam, obliquis, & ambi-



ambiguis sermonibus vsus esset, qui in suam aut aliorum contumeliam trahi & accommodari poterant.

Sed *Martinus Domitianum* tyrannum fuisse dicet. Certè si sic omnia fecisset, in numero bonorum principum certissimum locum reperijsset. Dempto enim ac diminuto honore atque probitatis opinione, quid tandem salui est? Conuicium molestius esse vulnere, liberi & ingenuj dicunt: & sunt, qui mori potius cupiunt, quàm nominis sui facere naufragium. Poeta *Nauius* ob nimiam in scribendo maledicentiam, cum contumeliam propositam non haberet; ab ipsis quidem *Triumuiris* in vincula coniectus est, & in carcere aliquandiu tenebatur. Sed maledicendi licentia & improbitas adeò processit, vt lex *Roma* per *Censores* lata fuerit, quâ eiusmodi probra ac maledicentia reprimerentur. Quod ab *Horatio Flacco* demonstratur, qui in Epistola ad *Octauium* refert veteres *Romanos* irato animo atque ægerrimo tulisse à poetis lacerari. Vnde fuit illis hæc quoque cura (inquit)

*Conditione super communi, quin etiam lex  
Pœnaq̃ lata, malo quæ nollet carmine quenquam  
Describi, vertèrè modum, formidine fustis  
Ad bene dicendum delectandumq̃ redacti.*

Sed vt hoc *Martini* non vulgare maledicendi genus esse perspiciatis, qui in Episcopos tantâ cum acerbitate inuectus est; audite, quid autor probatissimus refert de *Constantino* illo Magno Christianæ fidei patrono longè celebratissimo. Cum multi (inquit) Episcopi loco sententiæ indignas finitimorum Episcoporum criminationes deferrent, ac libellis prodendis causas ab eo cognosci postularent: tum *Constantinus* (libellis in sinum sine ulla lectione coniectis) ita perrexerit: Deus vos Sacerdotes constituit, & potestate de nobis iudicandi affecit. Et ideò nos rectè indicamur à vobis, vos autem nefas est ab hominibus iudicari.



*iudicari.*

Quid hoc est monstri? *Sarmatiam*, an *Angliam* incolimus? Christi religionem, an *αἰθραιοφάγαν* barbariem atque feritatem profitemur? qui *Martinistas*, id est sanctissimorum Episcoporum indignissimos carnifices inter nos vivere patimur? Quos augustissimus ille *Constantinus* (non tam propter imperium totius orbis, quàm religionis atque fidei synceritatem admirabilis & suspiciendus) non ad tribunal suum legitime sisti posse censuit: illos nos cuiuslibet impudentissimi Scurræ conuicijs obijcimus & exponimus. Aut ego fallor, aut hæc truculentissimam atheismi pestem regno nostro minitantur. Fides enim nostra iam pridem vacillare cœpit, cùm plurimi nusquam consistamus, nullam opinionem diu retineamus; sed diruamus quotidie, quod ædificauimus; & hostem quemcunque zizania falsæ doctrinæ purissimo veræ religionis tritico immiscere, vel clarissima luce patiamur.

At inquit *Martinus*; Quid tantum seuis in hominem, qui verè loquitur? Veritas criminis dolum excusat. Interest enim Reip. peccata nocentium esse cognita. Herclè non est *Martinus* in fingēdis mendacijs, quàm in peruertendo iure calumniosior. Nocentem infamare per leges potest, at non famosis libellis, at non nisi coram Iudice; vel si extra ius, non ex contumeliæ, non ex doli proposito. Respondet *Martinus*, Ego non dolum, sed reformationem cogito. Menti-enti non creditur, ne iurato quidem. Tunè hominum moribus rerum veritatem definiendam esse prædicas? Negas. Quid igitur hominum improbitatem arguis, cùm potius doctrinæ labes ostendere debeas? Tunè feres tuam religionem tuorum moribus examinari? Tum quidem pulchram religionem defendes. Nam ego tuorum vnum vxoris suæ filiam grauidam fecisse,

F. I.

alium



aliud execrandam Sodomiam perpetrasse, duos alios alternas vxores constuprasse noui. Prolixus hîc esse possem, si rumores leuiusculos cum *Martino* celebrarer. Sed ego non solum istorum nomina adhuc celebrabo, sed & aliorum multa scelera prætermittam, quæ ad aures meas non incertissimis rumoribus allata sunt. Non etenim mihi statutum est cum *Martino* in lacerandis hominum famis contendere; cupio in sceleratissimorum mimorum vitijs euulgandis tam esse parcus, quàm fuit ille profusus in sacratissimorum Episcoporum existimatione conuellendâ.

Sed quid, si non vera sunt, quæ istis viris affingis? Quid, si falsissima? Quid, si ne suspicionem iustam ferre possint? Fatebere te calumniæ poenas meruisse? Siquidem calumniari in criminalibus nihil aliud est, quàm falsa crimina dolo malo intendere; aut in fraudem alicuius falsum testimonium conficere. Quapropter vinculis multò strictioribus teneris, quàm si verè, minùs tamen legitimè contumeliam tot viris præclarissimis inuississes. Siquidem iniuria excusationem humanæ fragilitatis nonnunquam habeat: Calumnia verò, nisi in hominem iam antea desperatum & ab omni spe derelictum non cadat. Merito igitur Rex ille prudentissimus *Agésilais*, τὸς διαβόλους μέλλων, ἢ τὸς κλέπτας ἐμίσθ, μείζων ζημίαν ἢ γέμνος φίλων, ἢ χρημάτων περιουσίαν. Poenam autem calumniæ frontis inuersionem & notam fuisse *Plinius* in *Panegyrico* significat, cùm scribit; Neque ut antea exanguem illam & ferream frontem nequicquam conuulnerandam praebeant punctis, & notas suas rideant; sed spectent paria damno premia. Quod intellexisse quoque videtur *Cicero* in firâ *Roscianâ* hijsce verbis: Sed si hos iudices bene noui, literam illam, cui vos usque eo inimici estis, ut etiam alias omnes oderitis, ita vehemen-  
ter



ter ad caput vestrum affigent, ut postea neminem alium, nisi fortunas vestras accusare possitis.

Sed leges recentiores duplicem habent calumniæ considerationem. Nam alteram in ciuilibus faciunt iudicijs, alteram in criminalibus. De Ciuilibus ita Prætor est locutus. *In eum, qui, ut calumnia causâ negotium faceret, vel non faceret, pecuniam accepisse dicitur; intra annum in quadruplum huius pecunia, quam accepisse dicitur; post annum simpli, in factum actionem dabo.* Ita ut qui per Calumniam alterum non defraudauit, sed defraudare voluit, eâdem poenâ teneatur, quâ manifestus fur, bonorûmque raptor violentus: quippe quod in vtrisque eadem est doli vis; vtcunque Calumniatores tectius ambulant, suisque præstigijs legum austeritati sæpius illudant.

Sed & super hæc ciuilia iudicia, etiam criminaliter ad vindictam publicam Calumniatores rectè postulantur. Nam tenetur poenâ Talionis, etiam lege *Iuliâ Repetundarum*, & iudicio concussionis, nonnunquam etiam lege *Iuliâ de vi priuatâ*, & ex *S. C. Volusiano*, & lege *Corneliâ de falsis*, ac si capitale fraudem cuiquam machinati sint, de *Sicarijs*, Postremò *S. C. Turpiliano*. Atque ita variè pro modo & varietate delicti plectuntur. In criminalibus verò iudicijs, Calumniatoribus poena lege *Remmiâ* irrogatur, cuius meminit *Cicero* pro *Sexto Roscio*, & *Valla* libro tertio, capite septimo. Illa olim ferè pecuniaria fuit, sed hodie in publicis iudicijs est similitudo supplicij: ut quod alijs calumniosè creare moliti sunt, ipsi luant. In priuatis verò & extraordinarijs criminibus extra ordinem pro qualitate delicti puniuntur. Ita ut quorumcunque criminum *Martinus* Episcopos nostros falsò accusauerit, siue publicorum, siue priuatorum, si delicta illa certam poenam sibi habeant



à legibus constitutam, eâdem poenâ plectendus sit: Si incertam & Iudicis voluntati permissam; tum Iudicis, id est boni viri arbitrio coercendus. Exempli causâ, si quemquam adulterij falsò dolosèque criminatus sit, adulterio; si furti, furto; si hæresis, hæresi tanquam per iuris fictionem teneatur. Quippe quod supplicium illis, si fures, adulteri, vel hæretici essent, debitum, & infligendum est; in illius caput falsò illos accusantis, Prætorum decreta transmiserint.

Herclè non fronte, quàm toto corpore duriores *Martinum* dixero; non linguâ, quàm crumenâ luxuriosiores; si tot mulctis supplicijsque, quot hîc sibi contraxit, sufficere possit. Videtis igitur (adolescentes) hunc hominem omnium Rerumpub. etatûmque legibus tanquam ferreis catenis vndique comprehendi. Restat tantùm commune Ius huius regni, quod quia mihi minus est familiare, Iusticiarijs nostris prudentissimis fideliter exequendum potius relinquam, cùm *Martinum* deprehenderint, quàm hîc fusiùs explicandum: præsertim cùm mihi sit animus ostendere non quantum corporis periculum, sed quàm immensam mentium vestrarum iacturam horum libellorum lectio vobis afferre possit.

Nunc tandem videre liceat, *Martinus*, non quàm peritus artifex sit suæ disciplinæ, non quàm eruditus theologus: sed quantus sit Christianus potius, & an à Deo sit; bonique viri institutum cum exquisimâ sacrarum literarum normâ quàm aptè conveniat. Turpe enim est tantas tamque inauditas in Ecclesia Christianâ mutationes cogitare, & ipsius Christi exemplum in rebus emendandis minimè sequi. At nunquam ille Rerumpub. motus conabatur, nūquam vel tyrannicæ potestatis despicationem exoptabat,

nun-



nūquam hominis cuiusquam famam verbo violabat. Doctrinæ suæ sanctimoniam tam innocenti morum candore temperabat, vt totus vitæ suæ cursus longè clarissimum charitatis & patientiæ speculum eluceat. Hæ etenim duæ sunt virtutes, à quibus vberissimi dulcissimiq; fidei vitæque christianæ fructus efflorescunt, & vniuersa professionis nostræ ratio continetur. Siquidem altera nos erga Deum & vicinum ardentissimo dilectionis feruore concitet; altera durissimos quosque cruciatus propter *Christum* & libentissime subeat, & fortissimè sustineat. Hijs duabus si totum officium hominis fidelis definiatur; tūm qui neutrà earum coloratur, ostentationem fortè aliquam religionis inanem & Pharisaicam præ se tulerit; sed solidum & purum Euangelij succum non adhuc degustauit, nec veram fidei *inpretat* vnquam persensit.

*Martinum* me deridentem videre videor, quem impudicos libellos suos ad veræ Theologiæ trutinam reuocare intelligit: quippe quem tam institutū suum, quàm progressus totius operis facile demonstrat nihil minùs, quàm vel religionem, vel charitatem somniasse. At quorsum tunc tam multa de *Correctione* tūm personarum, tūm rerum ecclesiasticarum? Quorsum? stupidum & insensatum me esse oportet, qui hæc interrogem, ac si nescirem *Martinum* atque omnes sui similes in omne nefas esse proiectos, ad religionem extirpandam ipsius religionis puriorem speciē prætere, quidlibet audere, quosuis sanctissimos Domini vnctos conuicijs proscindere; quod sacrum est, violare ac prostituere, vt ad illam *inpretat* confusionem tandem peruenire possint, quam diu iam expetuerunt, & quotidie machinantur. Siccine est, *Martine*? Stuporem hunc tamen charitati nostræ, velim, ignoscas: quòd illa me suadebat ecclesiasticæ disciplinæ



reformationem nemini tam frequentem in ore fuisse; qui religionis præcepta contemneret. Et, si hanc culpam mihi condonaueris, in mercedem tibi promittā, me in posterum depositurum illam, quam habebam tuæ vel religionis, vel pietatis opinionem. Sed si tuæ impudentiæ tam concinnum & decorum existimes, illorum pietatem eleuare, qui ex sacro Dei verbo tibi litem intentant: liceat tamen de tam insigni prauitate tuā monere iuuenes Academicos, ne forsan (vt est natura hominum nouitatis auida) tuis ineptijs illud tēporis impendant, quod honestiori sanctiorq; disciplinæ tribuendū est. Quamuis quæ grauior fuerit iniuria tot adolescentibus & natis & educatis ad laudatarum rerum scientiam; quā diffidere, ne tam ludicris & insulsis nugis capiantur? Est tamen imbecillitas huius ætatis ad lapsum procliuior, & neminem vquam tam indoctum, tam absurdū, tam perditum hæreticum vlla ætas tulit, qui non aliquem suæ vesaniæ fautorem inuenit, non aliquem defensorem reliquit. Et vt verè fatear, quod sentio; peruenit ad aures nostras suspicio non leuis aliquos esse vestrum, quos illius ineptiæ tenent irretitos. Quæ pestis si repserit paulò longiùs, & medullas aliquando ceperit; actum est ilico de bonis artibus, quarum studio iam antea flauistis; actum est de modestiā vestrā, morūq; probitate, cuius summam laudem aliquando meruistis; actum est de illā expectatione vestrorum omnium, & ipsius reipub. nostræ, quam ad literarum perfectionem, vitæq; summā integritatem iam diu sustinuistis. Non igitur ægrè feratis (eruditi Iuuenes) hanc nostrā monitionem vtcunq; superfluum, minúsque necessariā. Siquidem illa tum amoris erga vos, tum erga vtrāq; Academiā pietatis meæ expressam testificationē habeat; in quibus non solum religionis nostræ constantiam,



am, sed & totius reip. foelicitatem collocare soleo.

Duplex hic mihi occurrit consideratio: quarum altera est de modo atque ratione illius, quam *Martinus* in se suscepit, inquisitionis: altera de veritate criminum, quibus viros multos omni laude dignos, deque ecclesiâ nostrâ optimè meritos oneravit. Quamobrem ponamus priore hoc loco singulas illas criminationes esse iustissimas, quas sacris Episcopis alijsq; eminentissimis ecclesiæ nostræ pastoribus affixerit: Quærere tamen liceat, quod diplôma, quæ autoritas est, quâ fultus *Martinus* tot reos vno impetu pro tribunali suo sistat? Spiritus. At sanè immundus. Christiana libertas. Pseudochristiana fortassis; Siquidem Christiana non est, quæ ab ipsius *Christi* dogmate tam turpiter aberrat. Ipse saluator humani generis Deus atque homo ad legis *Mosaica* ceremonias antiquandas nō descendit, nisi missus à patre. Discipuli eius non sunt illū sequuti, priusquā vocarentur; nō manus ad messem animarū iniussi posuerunt. Nullus subsequutus est *Apostolus* vel pius minister, qui vel extraordinariâ miraculis illustratâ, vel ordinariâ suâ vocationē ostendere non potuit. Vnicus est *Martinus* inter omnes ab initio mundi saltē bonus, qui nō accersitus in Domini vineam irrepsit, omnia in eadem pro arbitrio suo, id est, vix boni viri, mutaturus, dispositurus.

Quid enim? Extraordinariam vocationē, *Martine*, iactitas? At calumnias: mendacia, atq; impias vociferationes tuas video; miracula tua non video. Nisi hoc forsan sit miraculū, tuam impudentiâ ipsam impudentiæ ideam superasse. Sed quid? Ordinariam vendicas? At tum ab illo serpētino genere te parū discrepare oportet, quod testatur *Herodotus* nō nasci, nisi corroso prius, & exeso materno vtero. Nescio quantas habes gratias spirituali patri tuo si quis tibi manus imposuit;  
sed



sed agis certè perexiguas, cùm illum ne fidelium quidem coetu dignum existimes. Arguis etenim eum iniustam, inutilem, planèq; Antichristianam auctoritatem vsurpare; siquidem hoc loco cunctos Episcopos habes, crassâq; malitia occæcatus non vides te sic tuam propriam functionem, si quam habeas ecclesiasticam, euertere.

Cedo tandem, *Martine*, vocatus nè accessisti ad hoc opus tam egregium? Si minùs, non sine foedâ temeritatis atque impietatis notâ in alienas, præsertim Christi possessiones irruisti. Cùm etenim nulla vel infima quidem & abiectissima totius humanæ vitæ functio reperiatur, quam probè vel laudabiliter quisquâ tractare potest, qui ad eam præparatus, & instructus aliquo modo non accesserit: tum sanè summum illud augustissimûmq; munus vel scripturas interpretandi, vel næuos ecclesiæ perpurgandi; nemo nisi iam profligatus in omne nefas, planèq; desperatus, proprio motu ac immundis (quod aiunt) manibus in se suscepit. Illud etenim *Pauli* perpetuum est, & immutabile:

*πᾶς ὁ κυριεύσει, ἢ μὴ ἀποστασεί.* Quibus verbis beatus *Apostolus* non solùm viros sanctos ad euangelij prædicationem immediatè suscitatos; sed perpetuam illam atque ordinariam ministerij deriuationem ab ipsis *Apostolis*, successionemq; comprehendit. Quoniam igitur stupenda illa atque extraordinaria vocandi ratio cum ipsis *Apostolis* quasi mortua sit; nemóque ab illorum temporibus, saltem probus, rerum diuinarum negotijs sese immiscuerit, nisi sacri cuiusquam Episcopi manibus antea susceptis, ac persensis: tum *Martinus* aut ostendat tempus, locum, autorem suæ institutionis; aut saltem ab ouili, tanquam truculentus lupus, aut canis rabidus, arceatur.

Si vocatum se venisse *Martinus* dicat; quid tandem  
vineam



vineam Domini depopulando grassatur, ut aper è syl-  
uâ? Quid ab eiusdem laboris socijs se segregat & dis-  
iungit? Quid sacram hanc, antiquam, & ædificatam  
ab ipsis Apostolis Ecclesię nostrę structuram tam foe-  
dè peruellit ac discerpit? Nullum aliud inde præmi-  
um illi expectandum est, quàm formidolosa illa atq;  
horrida conuiuæ reiectio, quem *Matthæus* non indu-  
tum veste nuptiali, procubuisse memorat. Huius fari-  
næ sunt, quos *Diuis Iohannes* ait exiisse à nobis, sed è no-  
bis non fuisse. Si etenim *Martini* conatus ad singulas  
impuritatis atque nequitie notas à *D. Iudâ* designa-  
tas, tanquam ad Lydium lapidem, reuocemus: homi-  
nem ante tot sæcula, in eius temporis hæreticis & ne-  
bulonibus, non solum *ais ei τύπη*, sed ad viuum depictum,  
minutissimisque quasi partibus efformatum reperie-  
mus. Irreperunt illi: *Martinus* se ingessit. Illi domi-  
nationem contempserunt: *Martinus* eam pedibus  
conculcat. Illi de hominibus in autoritate positis ma-  
lè sunt locuti: *Martinus* sacrorum Episcoporum exi-  
stimationem multis iniuriarum hyperbolis lacerat,  
& conuellit. Illi, quæ ignorabant, blasphemabant:  
*Martinus* damnat, quę captum eius superant. Sed pro-  
grediamur. Dicit *Iohannes*, *Εν τέτρ' φανερόν ὅτι τὰ τίμα τῷ θεῷ, καὶ τὰ*  
*τίμα τῷ διαβόλῳ· ὡς ὁ μὴ ποιεῖν διακρίσιν, καὶ ἐστὶν ἐκ τῷ θεοῦ, καὶ ὁ μὴ ἀγαπᾷ τὸ ἀδελφὸν*  
*αὐτοῦ*. Deprehensum planè hīc *Martinum* mihi tenere  
videor, cū è duobus alterum sit necessarium; nimi-  
rum ut vel amorem suum erga fratrem ostendat; aut  
saltem à Deo se non esse confiteatur.

*Martinus*, si sibi ipsi fidem adhibeamus, à Deo est;  
sed reuerendissimi patres Episcopi charitatem eius  
desiderant. Quippe quos vniuersos *Antichristos* ap-  
pellat; singulos penè maledictis suis impurissimis,  
falsissimisq; configit. Sed (ut inquit *Paulus*) *ἡ ἀγάπη τοῦ πλη-*  
*στοῦ καὶ ἐστὶν ἡ κατανάλωσις*. Aut igitur *Martinus* Episcopos non



amat illos, quorum existimationem tantum lædere cupit; aut saltem tantum amat, vt ardoris æstu quodam abreptus (sicut amicorum aliquando mos est) in obiurgationes erumpat. At euerfionem, exiliū, perniciēmq; singulis minitatur. Incitatissimus hic feruor esse debet, qui cupit occidere quos amat. Sed vnde (quæso) tantus tanti tamque chari amici stomachus? Ab assiduis fortè delictis *Episcoporum*. Quos procul dubio sæpius impingentes grauissimus *Martinus* clementer, humanissimēq; monuit, nec tamen ad bonam frugem sic reuocare potuit, quin ad nequitiam fierent quotidie proniores. Re verâ *Christus* rectissimam omnium monendi rationem nobis proponit apud *Matthæum*, hijs verbis: Εὰν ᾖ ἁμαρτήσῃ εἰς σὲ ὁ ἀδελφός σου, ὑπάγε, καὶ ἐλάβε τὸν ἀντὶ σου καὶ ἀπὸ μὲν. καὶ σὺ ἀκούσῃ, ἐκέρδηςας τὸ ἀδελφὸν σου. Εὰν δὲ μὴ ἀκούσῃ, παρῆλας μὲν σοὶ ἐστὶ ἵνα, ἡ δὲ οὐκ ἵνα ᾖ τὸ σῶμα σου δύο μαρτύρων ἢ τριῶν σαθῶ πάντη ῥήμα. Εὰν δὲ παρῆλθῃ αὐτῶν, εἰπὲ τῇ ἐκκλησίᾳ. Εὰν δὲ καὶ τὴ ἐκκλησίας παρῆλθῃ, ἔστω σοὶ ὡς ὁ ἰδιώτης καὶ ὁ τελώνης. Amicissimos, prudentissimos, sanctissimósque reprehensionis gradus hoc saluatoris nostri præcepto contemplamur; quos si se *Martinus* obseruasse ostenderit, dicam sanè illum esse probiorem, quàm putaram.

Libenter igitur scire cupio, quando nostrum *Archiepiscopum Cantuariensem* in aliquâ muneris sui functione titubantem, vel in aliquo vitæ officio claudicantem inter se & illum, vel ascitis testibus admonuerit? Quando apud aliquos Magistratus ecclesiæ personam representantes accusauit? Solenniora fortasse sunt hæc, & non solum altiore indagationem, sed & pleniores probationes exposcunt. Magis compendiarium igitur viam *Martinus* duxit persequendā; & non vel priuatas monitiones, vel testes, vel Iudicem aliquem morari, sed ipse potius omnes partes agere statuit; & vt accusator, testis, atque Iudex in angulo &



& gurgustio (nescio quo) tot viros innocentissimos indictâ causâ, condemnare; deinde sententias suas calumniæ nequitiaëque refertissimas in vulgus (sic vt videtis) efferre atque publicare. At diuus *Paulus* charitatis speciosissimam imaginem ipsissimis suis coloribus depictam nobis reliquit, cum dixerit: ἡ ἀγάπη μακροθυμεῖ, χρηστεῖται. ἡ ἀγάπη ἐξυλοῖ. ἡ ἀγάπη ἐκσπεριεύει, ἐκφυσεῖ, ἐκασχημονεῖ, ἐκνετεῖ τὰ ἰαυήθη, ἐκπαροξύνει, ἐκλογίζει τὸ κακόν, ἐκχαίρει ὅτι τῇ ἀδικίᾳ, συγχαίρει ὅτι τῇ ἀληθείᾳ, πάντα εἰζει, πάντα πιστεύει, πάντα ὑπομένει. In quas singulas charitatis proprietates *Martinus* impegit, vt tandem nauiter impudens esse, omnes omnium nequitias superare, & ipsum diabolum spirare videatur. Ostendat etenim mihi *Martinista* vel omnium pertinacissimus, magistrum suum vel vnicum in vtróq; libello suo vestigium Apostoli pressisse, & vincat.

Cùm igitur ex sacro Dei verbo didiceritis illum à Deo non esse, qui fratrem suum oderit, infectatur, atque iniuriosè mordet; *Martinum* etiam intelligatis non in plebeios aliquos Christianos, sed in ipsos exercitus Christiani ductores malitiæ suæ virus tam iniquè, tam turpiter eructasse: quid eum tam assiduè legitis (Adolescentes?) quid in musæis vestris tam sollicitè retinetis, & occultatis? Quid non eiicitis potiùs, atque *Neptuno* vel *Vulcano* deuorandum primo quoque momento traditis? Multi quidem autores, illique minimè contemnendi viliorē apud vos habent estimationem, quòd sanctam & synceram *Christi* doctrinam vbique non obseruant. *Martini* igitur libellos non solum doctrinam *Christi* non obseruantes, sed impugnantes, & (quantum fieri potest) obruentes, spernite, fugite, condemnate. Sed odium *Martini* in integerrimos istos ecclesiæ nostræ præsides, & alios nonnullos honestissimos eiusdem alumnos vnusquisque vestrum facillè viderit. Nemo tamen malitiæ suæ



vehementiam, atque acrimoniam satis pro dignitate ponderare potest, qui ipsorum virorum, in quos tam magna sævit, naturam, doctrinam, & sanctitatem cognitas non habet.

Omnes quidem ipse non noui. Multi etenim sunt ab vtrâque Academiâ in valdè disiunctas istius terræ regiones iam olim profecti. Sed de aliquibus illorum, quorum consuetudo mihi perspectior fuit, nihil dubitabo vobis quod sciam, exponere. Sic autem exponam, vt loquar tantùm, quod sciam; nec tam ipsorum gratiam captare, quàm religionis iam nutantis atque vacillantis causam subleuare videar. Illud autem non pessimè fit illorum hominum famam estimationemque propugnando, quos à religione persistentes, isti versutissimi falsarij cunctis viribus suis cōtendunt in voracissimum inuidiæ publicæ gurgitem præcipites deturbare & immergere.

*Archiepiscopus* igitur *Cantuariensis* (in cuius oculos *Martinus* tam furiosè inuolat) *Cantabrigiæ* iuuentutem suâ in Collegio primùm *Penbrochiensi*, deinde *Petrensi* transegit. Vbi quidem vixit tam laudabiliter, vt non citiùs ad virilem ætatem perueniret, quàm ad publicam Theologiæ lectionem, ac paulò pòst ad præfecturam Aulæ *Penbrochiensis* deueheretur. In Scholis epistolam ad *Hebraeos*, ac ἀποκάλυψιν diui *Iohannis* exposuit tantâ cum admiratione omnium, vt peritissimos omnium Theologos in illis oraculis eruendis si non superare, saltem ad æquare iudicaretur. Collegium suum tam prudenter, tam iustè, tamq; temperatè gubernauit: vt illa domus, licet scientiarum laude semper florens, virisque doctissimis ornatissima, tantum splendorem diu non continuerit, sed ad Collegium sanctæ & indiuiduæ Trinitatis emisit, tanquam ad celsius theatrum, vnde virtutes eius longiùs elucere, atque



atque conspici possent. Quam prouinciam sic administravit, tanquam vitæ totius antea actæ rationem absolutissimam exactissimamque cunctis reddere cogitaret. Iam etenim cum in luce & in omnium oculis cum Magistratu versaretur; cum libros contra transmari-  
*nas* quasdam nouitates huc inductas conscriberet; cum rostra sæpissimè ascenderet; cum quotidianis *Academia* negotijs semper interesset, plerumque etiam præesset: illis literarum, prudentiæ, iusticiæque fructus in singulis suis actionibus declarauit; quos Deus vel dilectissimis suis seruis vendere, nisi pro multo sudore, multis precibus, perpetuæque bene viuendi constantiâ, non solet. Non ita multò post ad Decanatum *Lincolnia* sic deuenit; ut ab ipsâ illâ dignitate expeti, non eam expetere videretur. Hunc etenim cum altero magistratu sic retinuit, ut vtriusque loci coetum aduentu suo mirificè semper recrearet; discessu mestissimū relinqueret. Sed hæc tantas virtutes diu quiescere honores passi non sunt. Euocarunt etenim ad Episcopatum *Wigornia*: cum recedentem illum inusitata suorum multitudo non comitatu tantum, sed & infinitâ lachrymarum vi prosequeretur. Sex annos *Wigornia* sic præteruectus est; ut inde nihil *Cantuariam* præter famam integerrimam, & intimum totius prouinciæ *Cambrica* amorem exportaret. Ad ipsam hanc tandem huius imperij non ambitio, non prensationes, non corruptelæ; sed virtutum suarum fama, sed literæ, sed vitæ sanctimonia perduxerunt. Quo in loco tam præclarè se gessit, ut *Martini* falsissima crimina in vitam eius innocentissimam, castissimamque collata statim concidant; utque ignis in aquam coniectus, continuo restinguantur.

Alter eorum, quorum existimatione contra *Martini* impetus mihi defendendū officiū etiam mihi meū



imposuit, est *Episcopus Lincolnensis*; pro quo satis est dicere *Martinum* ipsum, & curiosissimum morum alienorum inuestigatorem, & austerissimum censorem de eo nihil posse conqueri, nisi quòd illud locutus sit, quod nunquam est locutus. Etsi etenim ipse mellitissimæ illi concioni non interfuerim, vnde virus tam perniciosum hæc aranea suffurata sit: ex testimonio tamen satis locupleti mihi constat, patrem illum ornatissimum in toto sermone suo nihil tale protulisse. Sed ad particulares illius calumnias descendere penitus esset infinitum.

Animaduertite igitur (obsecro) quis hic sit, cui *Martinus*, ne bono cuiquam probatòque viro parceret, impudentissimum mendacium affigere non dubitauit. Illum puerum honestissimi sui parentes eduxerunt ad illud *Aetona* gymnasium celeberrimum; vbi paucis annis in Grammaticæ studio positus, & iam summâ spe factum tum ad eloquentiam, tum ad alias scientias laudatissimas, in regale Collegium *Cantabrigia* merito suo cooptatus est. Illic, si bene memini, duodecim plus minus annos consumpsit. Quo in loco non diu vixit, priusquam naturæ bonitatem, vitæ integritatem, multasque literas omnibus comprobasset suis, exteris etiam commendasset. Fuit etenim ita sine dissimulatione pius, sine leuitate comis & urbanus, sine profusione ingenuus, sine acerbitate grauis, sine iactatione doctus; vt cum omnes iucundissimo suo consortio summopere delectaret; adolescentes tamen, si in quos incideret, effusiores, solâ suâ præsentia, tanquam frænis in officio continuerit. Vnde factum est, vt sibi forsan opportunè, cunctis tamē eius Collegij socijs præproperè, *Cantabrigiam* relinquere putaretur. Eadem etenim ætate, in qua vulgare studiosorum genus fundamenta Theologiæ vix pone-



re solet, ille factus est Euangelij prædicator, idque tanto cum omnium applausu, vt maioribus suis facile anteponeretur; ijsque qui subsequuturi essent, vix vllam imitandi spem relinqueret. A *Cantabrigia* ad *Aetonsenses* reuersus est, quibus tunc haud tam iucundus fuit illius aduentus, quàm paulò post molesta discessio. Illis etenim parietibus tantæ virtutes sic delitescere non potuerunt, quin statim ad Aulam Regiam illarum fama euolaret. Ita vt ad Ecclesiam *Vindisorientem*, & ad Aulam Principis eueheretur. A quo die quod subsequutum est temporis, in luce totius Reip. sic transegit; vt *Martinus*, etsi maledicendo seruperit, iustam aliquam reprehensionis causam in isto non inuenerit.

Tertius, de quo statueram aliquid dicere, est *Pernus*; qui licet timiditatis notam infoeliciorem non euaserit: fuit tamen doctissimus, afflictis fidelibus benignus, & Academiae *Cantabrigiensis* amicus maximè necessarius. Nam non solùm viuus in illius occupationibus se consumpsit; sed mortuus non contemnenda suæ beneuolentiæ monumenta (si vera sit fama) testamento suo reliquit.

Quartus est *Copcotus*, cuius virtutes vobis (*Cantabrigienses* apud quos viuit) ita sunt perspectæ & cognitæ; vt nostra oratione, nisi in *Oxoniensum* gratiam, non egerent. Tantùm igitur hoc dico: illum esse virum innocentiorē, doctiorē, probiorē, & vndique digniorē; quàm vt in Christianâ Rep. mimis istis ludibrijs exponi debeat. Et certè si quid sit, vnde nostra Ecclesia apud exteras malè audiat; hoc est, quòd in *Martinistis* istis exagitandis & cohibendis, plures *Copcoti* sedulitatem non imitentur. Sic enim fieri posset, vt Ecclesia nostra breui conualesceret, & pristinos vigores recuperaret; quam nunc ægram,



gram, collapsam, & quasi intermortuam conspici-  
mus.

Quintus atque vltimus est, vir omni laudum genere præstantissimus, *Cosinus*; qui sanè pluribus non est cognitus, quàm probatus. Et nisi *Martinus* efferata nimis calumniandi libidine pruriisset; cum sanè, si non honoris causâ, nunquam appellasset. Non ita multi sunt anni, cùm *Cantabrigia* viueret in Collegio *Trinitatis*; vbi quidem omnes, qui vehementiori literarum ac virtutis studio commouebantur, illum, tanquam exemplum, sibi imitandum proposuerunt. Si quidem tam multiplici doctrinarum varietate claruit, vt nihil penè esset erudito homine dignum, in quo ille magnos progressus non fecerat. Quod in illo tanto fuit admirabilius, quia nunquam in studio fuit tam immensus, quin in ingenuas proborum hominum congressiones, honestasque recreationes, horas quasi succisivas elargiretur. Ita fuit vrbani, vt vel infimis affabilem se præstaret; ita prudens, vt cum grauissimis senibus non iniuriâ compararetur; ita probus, vt nulla vnquam vel leuissima grauioris delicti suspicio vite eius adhæserit.

Hoc cene virtutis præmium (Adolescentes?) hij sunt industriæ, atque studij nostri fructus; vt quemadmodum vnusquisque est maximè vir doctus; ita nequissimorum rabularum conuicijs plurimùm laboret atque configatur? Deus bone: Non possum, quin exclamem, O tempora, ô mores.

*Elizabetha* nostra omnium, quæ vnquam in *Europâ* vixerunt, principum religiosissima, prudentissima, iustissima, fælicissima, iam triginta annos integros clauum florentissimæ nostræ Reip. tenuit; Religio ab exteris nationibus quasi exulans, tot annos apud *Anglos* se collegit, atque recreauit; tam altas radices e-  
git,



git, tamque pulchros progressus fecit : & tamen nec *religiosa Elizabetha*, nec *Elizabetha religio* prauissimorum nebulonum scelera sic coercere, aut comprimere potest, quin aliquis quotidie exurgat dæmoniacâ phrenesi percitus, qui & decreta *Elizabetha* sanctissima, & venustissimam religionis suæ fabricam conculcare audet, & obterere. Quis dubitat succensere nobis Deum Opt. Maximum, & pestem omnium atrocissimam Religionis confusionem ceruicibus nostris impendere; quos diuturna pax, quâ iam diu nos perbeati sumus; Euangelij libera prædicatio, quâ omnes nationes facile superamus; perpetuum fidei orthodoxæ semen, quo per totum terrarum orbem celebramur, sic confirmare non potuerunt; ut istis Ecclesiæ Christianæ perturbatoribus atque hostibus, operam, facultates, atque adeò latera nostra obijciamus? Habemusne iræ diuinæ clarissimum exemplum in *Korah, Dathan, & Abiram* contra *Mosen & Aaron* concitatis, eorumque auctoritatem diuino consilio stabilitam detrectantibus: & nos Ecclesiæ Christianæ reliquias quasi è naufragio reseruatas, atque in hanc nostram Insulam appullas, illorum faucibus vel quibuscunque viribus saltem legitimis eripere dubitamus, qui illas quotidie deuorare cupiunt? Eosque eousque excrefcere patiemur, ut nec disciplinâ cohiberi, nec armis opprimi potuerint?

Sed hæc non tam aptè vestris, quàm magistratuum nostrorum auribus conueniunt. Reprimam igitur me, quantum potero; & illud agam, quod vestra ætas atque educatio potissimum suadet.

Cum internam fidei puritatem externæ nostræ actiones apertissimè declarent; tum nihil certè apertius, quàm *patientia*. Vnde Christus miserrimis dolorum angustijs obrutus, cecidisse quidem ad humum,

H.I.

sed



sed non ingemuisse tamen legitur. Diuus *Paulus* infinitas, crudelissimâsque ærumnas patientissimè sustinuit propter Euangelium. Etiam *D. Iacobus* in Epistolâ suâ non sui tantùm temporis Christianis; sed & nobis, & futuris etiam omnibus Prophetas in exemplum *τῆς κακοπαθείας, καὶ τῆς μακροθυμίας* commendauit. Etiam ipse Saluator apud *Lucam* nos iubet *ἐν τῇ ἐσθραμονῇ ἡμῶν κτήσασθαι τὰς ψυχὰς ἡμῶν*. Ac si moneret sub ipsâ cruce lætandum esse nobis, atque exultandum. Si denique continuam Ecclesiæ fideique propagationem ab ipsis Apostolis ad hodiernum diem deriuatam contemplemur: nullum signum manifestius fidei orthodoxæ, vel veri martyrij certius argumentum, quàm *patientiam* reperiemus.

Sed ipsam effigiem Christianitatis verissimæ, mihi videtur ad viuum depingere *Tertullianus* in suo Apologetico, cùm ait: *Externi sumus, & vestra omnia impleuimus, urbes, insulas, castella, municipia, conciliabula, castra ipsa, tribus, decurias, palatium, senatum, forum. Sola vobis relinquimus templa. Cui bello non idonei, non prompti fuissimus, etiâ impares copijs, qui tam libenter trucidamur, si non apud istam disciplinâ magis occidi liceret, quàm occidere? Potuimus inermes, nec rebelles, sed tantummodò discordes solius diuortij inuidiâ aduersus vos dimicasse. Si etenim tanta vis hominû in aliquem orbis remoti sinû abrupissemus à vobis, suffudisset utiq; damnationẽ vestrâ tot qualiumcunq; amissio ciuiû. Quibus verbis grauissimus ille Christianorû patronus seditionis ac tumultus suspicionem illis inflictâ diuit, & abstergit; apertissimèq; declarat tantas illis temporibus fuisse fidelium multitudines, quantæ non solum pugnando, sed tantùm deficiendo illud imperiû in summas angustias adducere potuissent: cruciatibus tamen & tormentis, quæ tum plurimùm fauebant, sic frangi illos nō posse, quin tolerantia potius animabus, quàm fugâ corporibus suis prospiceret.*

Ecquid



Ecquid potest huic disciplinæ magis esse contrarium, quàm doctrina *Martinistarum*? Christus verberibus enecatus os suum cōtra sanguinolentos illos carnifices non aperuit: Isti ne appellati quidē fremunt & obmurmurant. *Paulus* in ærumnis suis se delectauit: hij in nullâ fortunæ fecunditate conquiescunt. Reliqui priscorum temporū Christiani pacem communē vitæ suę prætulerunt; isti sine tumultibus & plebis commotione vitam sibi duram ac acerbam putant. Ita vt, si illis permitteretur quod optāt; boni viri mihi videātur non tantum externam administrationis Ecclesiasticæ formā mutaturi; sed & ipsa Christianę religionis fundamenta peruersuri; nouamq; nobis & inauditā; atq; huic, quàm à Maioribus nostris acceptā tenemus, cōtrariā legis & Euangelij rationē inducturi. Quid multa? Date mihi, quam vultis, è sacris scripturis morū atq; vitæ regulā; & ego facillimè vobis ostendam, quàm turpiter, quàm flagitiosè *Martinus* eandem transfiliuit. Cuius tā crassis ineptijs si qui sint vestrū, qui decipiātur; illos certè quidē & Academiā, & literis, & beatissimo hoc vitæ genere prorsus indignos existimaui.

Vnicum iam mihi restat telum, quo *Martinus* necessario feriendus est, imò verò consternendus. *Malum non est faciendum, vt bonum inde veniat.* Hoc spiritus sanctus. At *Martinus*, vt munificam suam, quam nobis effinxit, pulcherrimāq; Ecclesię formam assequatur; censet quidem viros quosq; innocētissimos non solum in famæ, sed & vitæ suę discrimen pertrahendos; arma sumenda; quascūq; Respub. non permiscendas tantum, sed & diripiendas, atque dissoluendas; furias ipsas ab inferis excitandas; nullum deniq; scelus facinorosum & immane non perpetrandum. Non dubitauit certè furcifer ad defendendam nequitiam suam, calumniosas istas fictiones fucatā pietatis specie delibuerē,



Diuūmq; *Paulum* prætendere, *Omibus omnia factum,*  
*ut omnes lucraretur.*

Sed dicit *Augustinus*, *hæc compatiendo Paulum fecisse,*  
*non mentiendo.* Fit enim quisque tanquam ille, cui vult  
 subuenire, quando tantâ misericordiâ subuenit, quan-  
 tâ sibi subueniri vellet, si esset ipse in eâdem miseriâ  
 constitutus. Itaque fit tanquam ille, non quod fallit  
 illum; sed quia se cogitat, sicut illum. Vtcunque igitur  
 hic veterator vobis imponere studeat exemplis *Abra-*  
*ha*, *Obstetricum Aegyptiarum*, *Rahab* meretricis, *Pa-*  
*triarchæ Iacob*, *Dauidis*, *Pauli*, vel *Petri* denique atque  
*Barnabæ*, vestrasque acies huiusmodi præstigijs per-  
 stringere: vobis hoc sit perpetuum antidotum, hu-  
 iusmodi scilicet: facta vel aliquid significare μυστικώτερον  
 quàm ipsa litera indicat; vel saltem, vtcunque ab ho-  
 minibus sanctis perpetrata, diuinæ iusticiæ displicu-  
 isse. Spinæ etenim ficus non producant; nec quod  
 malum est, aliquid non malum suâ naturâ gignit. Hij  
 autem pacem ecclesiæ dirimere non reformidant;  
 dum imaginariam suam, friuolam, & phantasticam  
 disciplinam stabilire confidunt. Ecquid est vitæ com-  
 muni perniciosius, quàm non quid, sed quare quid  
 faciamus, perpendere? Hoc etenim cuiusvis facinoris  
 impunitatem daret, cui speciosam causam aliquam  
 prætexueris.

Sed dicet mihi aliquis; Viris istis sanctis & spiritu  
 sancto refertissimis lapsus suos concedemus; & vnici  
*Martini* facta ad tam seueram trutinam reuocabi-  
 mus, quòd feruentissimo disciplinæ suæ desiderio ab-  
 reptus, in iustam nonnullorum reprehensionem inci-  
 derit? Huius sanctitatem illis cancellis circumscri-  
 bemus, vt quod omnium integerrimis aliquando cō-  
 tigit, illud huic tantum denegemus? Hoc certè du-  
 rum esset, & austerum nimis.

Sed



Sed aliud est (Adolescentes) ex imbecillitate, aliud ex malitiâ delinquere; aliud in vitâ labi semel, aliud nequitiâ vesci, totâmq̃ue vitam in scelus profligare. Libros autem *Martini* qui legit, nihil aliud reperiet, quàm perpetuatum conuitium; sic autem vibratum, vt faciliè videas ad huiusmodi scurrilitates conquirêdas, totam eius vitam theatri illis Londinensibus, & leuissimis scenis, vel scurrarum & nepotum circulis insidiatam.

Hic itaque mimus impurissimus illo in loco apud homines literatos esse debet, vt de rebus Ecclesiasticis balbutiens ac diuinis audiatur? Difficile est dicere, maiori dolore, an admiratione me percellerent illa noua, cùm primùm audirem tantam esse leuitatem nonnullorum Academicorum; vt non solùm *Martini* libros summâ cum delectatione legerent; sed eius etiam defensionem (quamuis timidiorē) in se susciperent. Vt enim est homo flagitiosus & impurus; ita certè omnium, quos vnquam noui, stupidissimus. Quid? Voluptatem legendo quæritis? Illam apud alios multò suauiorē dulcioremque inuenietis. Vtilitatem? Hic miserrimam, calamitosissimâmq̃ue paupertatem vobis omnibus meditatur. Scientiam atque eruditionem? At *Martinus* literis ne quidem colorari videtur. Virtutem, vitæque sanctimoniam? Huius libelli viam ad scelus atque nequitiam docent. Primum etenim vestigium ad effrænem illam, ac desperatam vitæ prauitatem est, superiorum, præsertim illorum qui animarum nostrarum curam habent, contemptus atque despiciatio. Quod cùm vos semel rectè figere *Martinus* viderit; deinceps ad crassam morosissimâmq̃ue *φιλανθρίαν* perducet; quæ si mentes vestras vel leuiter tinxerit, statim vos tanquam turbine correptos, vel vt milites *Vlyssis* à *Cyrce* fasciados, ad pessimam



simam obscœnissimamq; morum turpitudinem præcipites pellit atque trahit.

Sic *Martinum* hunc, quàm potui veris atque germanis depinxi coloribus (dulcissimi Adolescentes) in quos per Deum opt. max. vos obtestor, vt puris & synceris oculis intueamini. Sic etenim fieri posse spero, vt monitionis huius nostræ fructus feratis non solum vobis ipsis; sed & Reip. nostræ & ecclesiæ Christi iucundissimos, vtilissimos, atq; sanctissimos. Quos florentes atque exuberantes in vobis vt ego perspiciam, à coelesti patre nostro summis precibus contendo per Christum Iesum. Quorum vtrique cum spiritu sancto, sit omnis honor & gloria nunc & in æuum. *Amen.*

*Totus vester,*

*A. L.*





